

**Izi ọma lele kpa
Joni
gbarụ a n'ọkwukwo
Nhne gbasiri ọkwukwo ka**

Izi ọma lele kpa Joni gbarụ a n'ọkwukwo gwehịaru Jizọsi iwhne lele Ikwu-Ọnu Chiokike, nye “ghọru badnụ, va wuru n'esilawuru aị” (1:14). Lele kpa ọkwukwo wam kwuru, be gbarụ izi ọma ka ma ele badnụ kweru nụ Jizọsi bụ Nye Ọznohia wam, Nnwọ Chiokike, hite n'ọkwnata mkpoma nụ rẹwhna a, be nwehịa bụdnu (20:31).

Joni mernu a mahia nụ Jizọsi bụ Ikwu-Ọnu Chiokike. Eru ndu-ehni Jizọsi gesiri nụ ọ bụ Nye Ọznohia wam Chiokike kweru mkwna. Ọkwukwo ka gesiri nụ agwna ele badnụ kweru nụ Jizọsi ghọ ele sno apna a, kọvu ele berere kwéle nụ a, be bụru ele neemegidne Jizọsi dū n'ẹnwu a.

Joni kwusiri nhne gbasiri nkesi bụdnu kwó okwo rikne hite nụ Karaịsi, nookwu nụ Jizọsi bụ apna, ezi ọka nụ bụdnu. Nụ ọkwukwo Joni, a whnurnu nụ nhne a nọowhnu anya kpakara ọbochi lele mini, brẹdi, iwhne, nye znụ atnurnu nụ atnurnu a, isisi nụ mkpuru a, neegesi nhne ke Enine.

Nhne zị n'ọkwukwo ka

Ọpanizo (1:1-18)

Joni Nye Wụ Mini nụ ele sno apna Jizọsi mbom (1:19-51)

Eru Jizọsi nụ ọhna (2:1---12:50)

Ọbochi ipne-aznụ nụ rime Jeruselem (13:1---19:42)

Olizọ n'ẹnwu nụ ọwhuya iwhne Nyenwe aị (20:1-31)

Ọ whuyaru iwhne nụ Galili (21:1-25)

Nye gbarụ ọkwukwo ka: Jóni

Risi nhne o kwno gba a: Ma ele badnụ kweru nụ Jizọsi bụ Karaịsi wam, ma hite n'ọkwnata mkpọma nụ rẹwhna a, be nwehịa bụdnu.

Ikwu-ọnu ke ghoru badnụ

¹ Nụ mbọm hne Ikwu-ọnu wam zị, Ikwu-ọnu wam nụ Chiokike zị nụ mbọm, Ikwu-ọnu wam bụ Chiokike. ² Ya nụ Chiokike zị nụ mbọm.

³ Be keru kpakara nhne hite n'aka a, ọ zà nhne ke be keru hne ọ zịla. ⁴ Ikwu-ọnu wam bụ risi bụdnu, bụdnu wam bụ masị iwhne ke badnụ. ⁵ Iwhne wam nọomu nụ rime ọchichiri, ọchichiri nwée rikne nwegidne a.*

⁶ Chiokike ziyaru otu nyerukna rẹwhna a bụ Jóni.

⁷ Jóni varụ lele nye akebne ke iwhne wam, ma kpakara ele nurnu izi a kweru n'iwhne wam. ⁸ Jóni bụo iwhne wam, kọvu ọ bụ nye akebne iwhne wam. ⁹ Ka bụ iwhne wam n'ezi bụ ke varụ n'owa, ke neenye kpakara ele badnụ iwhne.

¹⁰ Ikwu-ọnu wam zị n'owa, ọ bụ n'ezi nụ Chiokike keru ọwa hite nụ rime a, kọvu ọwa máa nye ọ bụ.

¹¹ Ọ vakwnusiri ele ke a, kọvu ele ke a nábnanyana a.

¹² Kọvu kpakara ele nabnanyarnụ a, kwerumakọ nụ rẹwhna a, o nyernu be rikne be bụru rụmu Chiokike. ¹³ Be mụge ele ka lele kpa be murnu ele badnụ. Be mụge be hite n'echiche ke badnụ, mọbu hite nụ nda k'owa, kọvu Chiokike bụ Nda be.

* **1:5** nwée rikne nwegidne a: mọbu nwée rikne ghọhia a.

¹⁴ Ikwu-ọnu wam ghọru badnụ, va wuru n'esilawuru aị. A whnurnu igwugwu a, bu igwugwu ke Nnwọ Nda a murnu kpọi, oru nụ ezi ọka jihiaru nụ rime a.

¹⁵ Jóni gbarụ akebne gbasiri a, siwama, kaa, “Ka bu nye me nookwu ọka a nụ o snogwu m n'aznụ, kọvu o kakwo m, kwnornu nụ o zi sụ be murnu m.”

¹⁶ Hite n'oru a zi agida, a nwernu ngozi tukwasi nụ ngozi. ¹⁷ Chiokike hiri n'aka Mozizi nyee iwu, Chiokike nyee masiri oru nụ ezi ọka hite n'aka Jizọsi Karaịsi. ¹⁸ O zá nye whnuleru Chiokike anya. Nnwọ Nda a murnu kpọi, nye bu Chiokike, nye zi n'akwankọ ke Nda a, mernu ele badnụ mahia Nda a.

Jóni karụ nụ o búo

Karaịsi

(Mat 3:1-12; Mak 1:1-8; Luk 3:1-18)

¹⁹ Ka bu akebne Jóni gbarụ nga ele risi ele Ju zi nụ Jeruselem ziznenu ele ariohna nụ ele Livai be sịkwa a, “Ị bu nyele?”

²⁰ Jóni sarụ be, o gọla ego, kọvu o kwusiri a rikne, kaa, “M búla m Karaịsi.”

²¹ Be sịkwa a, “Ị bu kọ nyele? Ị bu Elaija sa?”

Jóni kaa, “Óza.”

Be sịkwa a, “Ị bu Nye Ọwhnurninya wam?”†

O sarụ be, “Óza.”

²² Be kaa, “Kanụ aị nye ị bu, ma a mahia nhne a jaakanụ ele dusiri aị. Kini bu nhne i kwuru gbasiri ẹhni i?”

²³ Jóni sarụ be,

† **1:21** Nye Ọwhnurninya wam: Gwnụ Ditaronomi 18:15; Ẹnu Ele Izi 3:22

“M bú m akpíri nye nọokpo okwo n'ẹli-ìkpa,
 ‘Anụ mekwata apna Nyenwe aị ma ọ snịrni
 asnị,’
 lele kpa Azaya nye ọwhnurninya kwuru.”

²⁴ Ele izi ele Farisi ziyaru, ²⁵ sịkwaru Jóni, “Ị búo
 Karaịsi, mọbu Ẹlaija, mọbu Nye Ọwhnurninya wam,
 kịni mernu ị nọowu ele badnụ mini?”

²⁶ Jóni saru be, “M ji m mini nọowu ele badnụ
 mini, kọvu otu nyenum gwuzo n'esilawuru anụ,
 nye anụ máa. ²⁷ O snogwu m n'aznụ, kọvu m
 kwésile m ọ tọma eriri okoro-ọchi a.”

²⁸ Kpakara nhne ka mernu nụ Bẹtani n'ọbosi
 ẹnam ke aznụ Osimini Jọdani kiyari, hne Jóni
 nọowu ele badnụ mini.

Jizọsi, Nnwọ Atnurnu Chiokike

²⁹ N'ekile a, Jóni whnurnu Jizọsi hne o naavak-
 wnusi a, ọ kaa, “Anụ le, ka bú Nnwọ Atnurnu
 ke Chiokike, nye noovume mmehie k'owa. ³⁰ Ka
 bú nye wam me nookwu ọka nga me karu, ‘Otu
 nyenum sno m n'aznụ, kọvu ọ kakwo m, kwnornu
 nụ ọ zị sụ be murnu m.’ ³¹ M máam nye ọ bú, kọvu
 m nọowu ele badnụ mini ma ele Izireli mahia nye
 ọ bú.”

³² Ka bú akebne Jóni gbaru, “M whnurnu m
 Enine Nsọ hi n'oligwe lele nduru dnakwasị a,
 daziri n'olu a. ³³ Kọvu nụ m máam nye ọ
 bú. Chiokike nye ziyaru m me wu ele badnụ
 mini kannu m, ‘Ị jọowhnu Enine Nsọ hi n'oligwe
 dnakwasị otu badnụ dazigidne nụ ya, nye wam bú
 nye jeeji Enine Nsọ nọowu ele badnụ mini.’ ³⁴ Me

nụ iwihuru m whnũrnu a, gba akebe ne nũ nye ka bũ Nnwọ Chiokike.”

*Ele mbòm sno
apna Jizọsi*

³⁵ N'ekile a, Jóni nũ ele sno apna a lawũru gwuzo. ³⁶ Nga ọ whnũrnu Jizọsi hne o neewhe, ọ kaa, “Anũ le Nnwọ Atnũrnu ke Chiokike.”

³⁷ Ele sno apna a lawũru wam nũrnu a, be snornu Jizọsi. ³⁸ Jizọsi tũhnasarnu whnũ nũ be noosno a n'aznũ, ọ sịkwa be, “Kini bũ nhne anũ noopio?”

Be kaa, “Rabai” (ke bũ, Nye-zni-nhne), “Ndaa hne i wu?”

³⁹ Jizọsi sarũ be, “Anũ va whnũrnu.” Ọ bũ nhne nũ lele ọtnu-ige ke ẹno n'iwhehnie,[†] be snornu a zne whnũrnu hne o wu, be nũ a daziri kpakara ọbochi wam.

⁴⁰ Otu nũ rime ele nũrnu nhne Jóni kwuru ke snornu Jizọsi bũ Anduru nwene rukna Saịmoni Pita. ⁴¹ Ngangam, o piohịaru nwene a rukna, Saịmoni, ọ kanũ a, “A whnũna m Mezaya” (ke bũ Karaịsi). ⁴² O kwuznenu Jizọsi Saịmoni.

Jizọsi legidne Pita anya kaa, “Ị bũ Saịmoni nnwọ Jóni, be jookwu i Kifasi,” be tũhnasna a, Pita, ke bũ rugwu.

*Jizọsi sukwuru Filipu
nũ Nataneli*

⁴³ N'ekile a, Jizọsi kpebi o zne Galili, o piohịa Filipu, ọ kanũ a, “Snornu m zne.”

⁴⁴ Filipu, Anduru nũ Pita hi nũ ẹli Bẹtesaida.

⁴⁵ Filipu pohịa Nataneli, ọ kanũ a, “A whnũrnu

[†] **1:39** Ọtnu-ige ke ẹno n'iwhehnie: ọkwukwo ke mbòm kwuru ige nri awa

nye wam Mozizi nù ele ọwhnurninya gbarù nhne gbasiri a n'ọkwukwo nsọ, Jizọsi nye Nazareti, nnwọ Josefu.”

⁴⁶ Nataneli sịkwa a, “Èli Nazareti, o nwernu nhne ọma ọbula ke jeehi n'èli Nazareti whuya?”

Filipu sarù a, “Vaa, whnurnu.”

⁴⁷ Nga Jizọsi whnurnu Nataneli naavakwnusi a, o kwu nhne gbasiri a, “Ka bù nye Izireli n'ezi, nye aghigho zila nù rime a.”

⁴⁸ Nataneli sịkwa a, “Nda kpa i jiri mahia m?”

Jizọsi sarù a, “M whnurnu m jì nù mkpururu isisi figi sù Filipu sukwuru i.”

⁴⁹ Nataneli sarù a, “Nye-zni-nhne, ì bù Nnwọ Chiokike. Ì bù eze Izireli.”

⁵⁰ Jizọsi sịkwa a, “Ì kweruru kpọi kwnornu nù m karù m nù m whnurnu m jì nga ì zì mkpururu isisi be kwu figi? Ì jọowhnu nhne ke kakwo ka.”

⁵¹ Ọ kanù be, “Me kanù anù ezi ọka, anù jọowhnu hne oligwe kpumernu, nù ele enine izi Chiokike neepnezne, neehidna n'olu Nnwọ ke Badnù.”

2

Jizọsi mernu mini ghọ manya

¹ N'ọbochi ke ẹto, ọlulu nnwerne zì n'èli Kana n'èli Galili, nne Jizọsi zì masị pịi. ² Be sukwuru Jizọsi nù ele sno apna a n'ọlulu nnwerne wam. ³ Nga manya be nọonwo kworu, nne Jizọsi kanù a, “Be nwéma manya.”

⁴ Jizọsi sarù a, “Ọ gbásila m, sị nwerinya. Ige m yóoduge.”

⁵ Nne a kanụ ele neezne izi, “Anụ mee nhne ọbula ọ karụ anụ mee.”

⁶ Idudu mini isunu gwuzo ndundu be jiri rugwu kpụ, ke ele Ju ji nọosnu nhne lele kpa omen'eli be jiri ziri, ke otu jeeri nri lawuru mọbu nri ẹto galoni mini. ⁷ Jizọsi kanụ ele neezne izi, “Anụ gbajite be nụ mini.” Be gbaji be mini dū n'ọnu be.

⁸ Ọ kanụ be, “Anụ kwuhia agwna mini wam gweznenu nye risi ngadna iriri.”

Be gweznenu a. ⁹ O detu mini wam ke ghoru manya riro. Ọ máa hne manya wam hi, kovu ele neezne izi ele gbarụ mini wam magwu. O sukwu nye nọolu nnwerne, ¹⁰ ọ kanụ a, “Nye ọbula neekesi manya kakpa mma n'oziri, nga ele izne nwokparu manya, o ke manya ojo. Kovu i bitaru manya kakpa mma dū kitna.” ¹¹ Ka bu ẹnu ndu-ehni mbom Jizọsi rnuru. Ọ rnuru a nū Kana n'eli Galili, o gesi igwugwu a, ele sno apna a kwnata a mkpoma.

¹² Nga ka whemernu, Jizọsi nū nne a, nū rumu nne a, nū ele sno apna a zne Kapanom, be daziri pji ọbochi ele nū ele.

Nhne Jizọsi mernu n'Oro Nso Chiokike

(Mat 21:12,13; Mak 11:15-17; Luk 19:45,46)

¹³ Iriri Ogawhe ele Ju zi ndundu, Jizọsi zne Jeruselem. ¹⁴ Ọ whuru ele neere aturu nū ehni nū nduru nū ele naagbanwo iwai dazigu n'ikpechi n'Oro Nso Chiokike. ¹⁵ O gweru eriri mee mbini, chihala kpakara be, ma ehni ma aturu. O kpote ikpechi kpakara ele naagbanwo iwai ruwnu n'eli, chisakwo iwai be. ¹⁶ Ọ kanụ ele

neere nduru, “Anụ whọga hna, anụ méma ọro Nda m ọro ahịa.”

¹⁷ Ele sno apna a chenwanya nhne be gbarụ n'ọkwukwo nsọ, “Nhne gbasiri Ọro Nsọ Chiokike neerne lele bẹkwnu nụ rime m.”

¹⁸ Ele Ju sịkwa a, “Ndaa ẹnu ndu-ẹhni ke ị jọornu ke neegesi nụ ị nwernu rikne mee nhne i neeme?”

¹⁹ Jizọsi sarụ be, “Anụ kwnadna Ọro Nsọ ka, m joowulizọ a n'ọbochi ẹto dai.”

²⁰ Ele Ju sarụ a, “Be jiri nri awha ẹno nụ isunu wu Ọro Nsọ ka, i joowu a n'ọbochi ẹto?” ²¹ Kọvu Jizọsi kwuru ọka gbasiri ẹhni a lele Ọro Nsọ Chiokike. ²² Nga Jizọsi hiri n'ẹnwu lizọ, ele sno apna a chenwanya nụ o kwuru ọka ka, be kweru nhne ọkwukwo nsọ kwuru nụ nhne Jizọsi kwuru.

²³ Kpa Jizọsi zị nụ Jeruselem nụ Iriri Ọgawhe, agida ele badnụ kweru nụ ya kpa be whnurnu agida ẹnu ndu-ẹhni ọ nọornu. ²⁴ Kọvu Jizọsi kwéle o nyee be ẹhni a, kwnornu nụ ọ magwụ kpakara badnụ nkari nkari. ²⁵ Ọ zila mkpa nụ be kanụ a nhne gbasiri nye ọbula, kwnornu nụ o magwụ nhne zị nụ mkpọma be.

3

Jizọsi nụ Nikodimọsi

¹ Otu nwerukna be kwu Nikodimọsi, otu nụ rime ele Farisi, nye risi ele Ju, ² vakwnusiri Jizọsi n'abalị. Ọ kaa, “Rabai, a magwụ nụ ị bụ Nye-zni-nhne ke Chiokike ziyaru, kwnornu nụ ọ zá nye jọornuli ẹnu ndu-ẹhni ị nọornu okwolem ma Chiokike dagwunu a.”

³ Jizōsi saru, “Me kanu i ezi oka, o za nye jowhnu n’eli-eze Chiokike anya, o buru nu be mugele a berere.”*

⁴ Nikodimosi sika a, “Ndaa kpa be jomu badnu berere nga o mernu okno badnu? O jaabna nu ruwho nne a berere, be mu a?”

⁵ Jizōsi saru a, “Me kanu i ezi oka, o za nye jaabna n’eli-eze Chiokike o buru nu be mugele a hite nu mini nu Enine. ⁶ Nye ke badnu etekne murnu bu an-ehni, nye Enine murnu bu enine. ⁷ O gbáwoji i anya nu m karu m nu be jomuriri anu berere. ⁸ Ruwhere neewhe hne o masigwu a, i nonu imerne a, kovu i máa hne o hi mōbu hne o neezne. Nye obula ke be murnu hite n’Enine nu kpa.”

⁹ Nikodimosi sika a, “Ndaa kpa be jeeme nhne nu kpa?”

¹⁰ Jizōsi saru a, “I bu nye-zni-nhne n’eli Izireli, kovu i máa nhne ka. ¹¹ Me kanu i ezi oka, a nookwu nhne a magwu, a naagba akebne nhne ke a whurnu, kovu anu kwé o nahoru akebne ai. ¹² Anu kwé nhne me kwuru gbasiri nhne k’owa. Ndaa kpa anu jeekweru o buru me kanu anu nhne k’oligwe? ¹³ O za badnu obula ke znernu oligwe nu mbom, okwolem Nnwō ke Badnu nye hiri n’oligwe hiedna. ¹⁴ Lele kpa Mozizi gwelizoru agwō n’olu isisi n’eli chna chna chna, o bu kpa be jeegwelizō Nnwō ke Badnu olu, ¹⁵ ma nye obula ke kweru nu ya jeenwe budnu kwó okwo. ¹⁶ Kwnornu nu Chiokike whurnu owa n’anya kpa, o gweru Nnwō o murnu ya nu nsunu a kpōi nyega, ma nye obula

* **3:3** be mugele a berere: mōbu be mugele a hite n’oligwe.

ke kweru nù ya jónwu ẹnwu, kọvu o jeenwe bụdnu kwó okwo. ¹⁷ Kwnornu nù Chiokike zíyage Nnwọ a n'ọwa ọ bụru nye kpe k'ọwa, kọvu ma ọ bụru Nye Ọznohia k'ọwa. ¹⁸ Be jéekpe nye ọbula ke kweru nù Nnwọ wam ikpe, kọvu nye ọbula ke kwége bụ nye be kperu ikpe, kwnornu nù o kwége nù Nnwọ Chiokike mụnu ya nù nsnunu a. ¹⁹ Ka bụ ikpe wam be kperu ọwa, iwhne varu n'ọwa, ele badnu whnurnu ọchichiri n'anya karu iwhne, kwnornu nù be nọornu ẹnu ọjo. ²⁰ Nye ọbula ke nọornu ẹnu ọjo bụ nye irno ke iwhne, ọ jáava nù rime iwhne ọ zị iwhne kpume ẹnu ọjo a. ²¹ Kọvu nye ọbula ke nọornu ẹnu ọma jaava nù rime iwhne ma iwhne gesi nù ẹnu a bụ nhne ọ rnurnu hite nù Chiokike.”

Jizọsi nù Jóni Nye Wu Mini

²² Nga ka mekworu, Jizọsi nù ele sno apna a znernu n'ẹli Judiya, ya nù be daziri ige matị, ọ wu ele badnu mini. ²³ Jóni masị zị nọowu mini n'Enóni ke zị Salim ndundu, kwnornu nù agịda mini zị pị. Ele badnu neeznekwnusi a, ọ nọowu be mini. ²⁴ (Be yéeyisige Jóni n'oro ikelu n'ige ka.) ²⁵ Agwna ele sno apna Jóni nù otu nye Ju nọdogbuta nhne gbasiri ọsnusnu nhne lele kpa omen'ẹli ele Ju jiri ziri. ²⁶ Be vakwnusi Jóni kanu a, “Nye-zni-nhne, nwerukna wam jị nù a zị n'aznu Osimini Jodani kiyari, nye i gbaru akebne gbasiri a, ọ nọowu ele badnu mini, agịda ele badnu neeznekwnusi a.”

²⁷ Jóni saru be, “Ọ zá nye ọbula ke jeenwe nhne ke Chiokike késile a. ²⁸ Anu bụ ele akebne m nù m karu m, ‘M bụo m Karaịsi, kọvu be beru ọsno ziya m nù ruwhnu a.’ ²⁹ Nye nọolu nnwerne ikne bụ nye

nwe nnwerne ikne, kovu enyi nye noolu nnwerne ikne, nye noogwuzo noobno nsni, mkpoma nọoso a n'onu nu o nurnu nkoli nye wam nọolu nnwerne ikne. O bu kpa snarnima m jiri zu ozu kitna. ³⁰ O jaazi naaba aba, kpa me jaazi naaya eli eli.”

Nye ke hiri n'oligwe va

³¹ Nye wam ke hiri n'oligwe va kakwo kpakara badnu, nye hi n'owa bu nye ke owa, o nookwu nhne ke owa. Nye hiri n'oligwe kakwo kpakara badnu. ³² O nookwu nhne o whnurnu nu nhne o nurnu, kovu o za nye neekweru izi a. ³³ Nye obula ke jeegweru izi a naakahia nu Chiokike bu nye ezi oka. ³⁴ Nye Chiokike ziyaru nookwu ikwu-onu Chiokike, kwnornu nu Chiokike nyene a Enine a n'apna zi mati. ³⁵ Nda whnurnu Nnwọ a n'anya, gweru kpakara nhne yisi n'aka a. ³⁶ Nye obula ke kweru nu Nnwọ wam nwernu budnu kwó okwo, nye obula ke za noobnonu Nnwọ wam nsni, jeenwe budnu, kovu ovu owe ehni Chiokike jaazi nu risi a okwnukokwnu.

4

Jizosi nu nwerinya

Sameria

¹ Ele Farisi nurnu nu Jizosi neewehia ele sno apna a, nọowu be mini karu Jóni, ² o bu n'ezi nu Jizosi wuge ele badnu mini, kwolem ele sno apna a. ³ Nga Jizosi nurnu a, o whuya nu Judiya naalahna Galili.

⁴ O zi mkpa nu o jaagawhe n'esilawuru eli Same-ria. ⁵ O vadu n'otu eli-ohna Sameria be kwu Saika, ke zi ndundu otu eli Jekopu nyernu nnwọ a rukna

Josefu. ⁶ Omi Jekòpu zì pji. Inwe gwùru Jizòsi kwnornu nù izne wam, ò daziri òlì nù ngeri òmi wam n'iwhehnie.*

⁷ Otu nwerinya Sameria varu ò tũru mini n'omi, Jizòsi kanu a, “Kesi m mini.” ⁸ (Ele sno apna a znernu nù rime òlì-òhna ò zũ wiri.)

⁹ Nwerinya Sameria wam kanu a, “Ì bũ nye Ju, m bũ m nye Sameria, ndaa kpa ì nqorio m mini?” (Ele Ju nù ele Sameria mèkòta nhne.)

¹⁰ Jizòsi saru a, “Ò bũru nù ì magwu nkesi Chiokike, nù nye ke nqorio ì mini, ì jqorio a ma o kesi i mini ke bũdnu.”

¹¹ Nwerinya wam kaa, “Nda-aì-kwu, i nwée nhne i jeeji nqotu mini, òmi ka miri emi k'agida, ndaa hne i jeegwehia mini bũdnu ka. ¹² Ì kakwo nda aì Jekòpu nye nyernu aì òmi ka, ò nwòru mini hi nù rime a, ma rũmu a, ma rũmu anòhia a?”

¹³ Jizòsi saru a, “Nye obula ke jòonwo mini ke hi n'omi ka, akpìri jòokpo a bèkwnu berere, ¹⁴ kovu nye obula ke jòonwo mini ke me jeenye a, akpìri jòokpo a bèkwnu berere. Mini ke me jeenye a jòogho risi mini ke jaagba dũ bũdnu kwó okwo.”

¹⁵ Nwerinya wam kaa, “Nda-aì-kwu, kesi m mini ka ma akpìri gharu ò kpò m bèkwnu, ma m gharu m ò va ò tũ mini n'omi ka.”

¹⁶ Jizòsi kanu a, “Zne, sukwu nzi i, va hna.”

¹⁷ Nwerinya wam kaa, “M nwée m nzi.”

Jizòsi kanu a, “Ì kwukwaru nkari nù i nwée nzi, ¹⁸ kwnornu nù ì gbòlam nzi isne, nye ke jì nù a wu kìtna búo nzi ì. Ì kwuru ezi òka nù i nwée nzi.”

* **4:6** n'iwhehnie: òkwukwo ke mbòm kwuru otnu-ige ke isunu

¹⁹ Nwerinya wam kaa, “Nda aị-kwu, m whnurnu nụ ị bụ nye ọwhnurninya. ²⁰ Ele nda aị kpọrụ risi ẹlị n'olu rugwu ka, kọvu anụ ele Ju karụ nụ hne be kwesiri ọ kpọ risi ẹlị bụ nụ Jeruselem.”

²¹ Jizọsi kanụ a, “Nwerinya, kweru nhne me naakanụ ị, ige vawa nga ele badnụ jọokponu Nda risi ẹlị n'olu rugwu ka mọbu nụ Jeruselem. ²² Anụ ele Sameria máa nye anụ nọokponu risi ẹlị, aị ele Ju magwu nye a nọokponu risi ẹlị, kwnornu nụ ọznohia hi n'aka ele Ju va. ²³ Kọvu ige vawa, owe, ige wam valẹm masị, nga ele nọokponu Nda risi n'ẹlị n'ezi jọokponu a risi ẹlị n'enine nụ n'ezi ọka. Ka bụ ele Nda pioru kpọnu a risi ẹlị. ²⁴ Chiokike bụ enine, ele nọokponu a risi ẹlị jọokporirinu a risi ẹlị n'enine nụ n'ezi ọka.”

²⁵ Nwerinya wam kanụ a, “M maam nụ Mezaya, nye be kwu Karaịsi, jaava. Nga ọ varụ, ọ jaakanụ aị kpakara nhne.”

²⁶ Jizọsi kanụ a, “Me nye nookwunu ị ọka, bụ ya.” ²⁷ Ige wam ele sno apna Jizọsi hiehna, o jiri be anya nụ ya nụ nyerinya nookwurita ọka. Kọvu ọ zá nye sịkwaru, “Kini bụ nhne i noopio?” mọbu, “Kini mernu i nookwunu nwerinya ka ọka?”

²⁸ Nwerinya wam sịgbasi idudu mini a, lahna nụ rime ẹlị-ọhna, kanụ ele badnụ, ²⁹ “Anụ va whnurnu nwerukna ke kannụ m kpakara nhne me mernu. Nye ka ọ jọoburu Karaịsi sa?” ³⁰ Be gbahala nụ rime ẹlị-ọhna znekwnusi Jizọsi.

³¹ Kọvu ele sno apna a zị naariasno Jizọsi, kaa, “Nye-zni-nhne, ri wiri.”

³² Jizọsi kanụ be, “M nwernu m wiri ke anụ máa.”

³³ Ele sno apna a neesikwarita ehni be, “O nwernu nye gweyannu a wiri sa?”

³⁴ Jizosi kanu be, “Wiri m bu o bita echiche nye ziyaru m nu o rnukpa ernu o nyernu m. ³⁵ Anu naakaa, ‘O gwnarnu enwa eno, anu gwe nhne n'ekwu.’ Kovu me kanu anu, anu le anya n'ekwu, mkpuru chnanam ma be ghoru nhne n'ekwu. ³⁶ Nye neegwe nhne n'ekwu nwernu ogwo ernu, o chibna ele badnu lele mkpuru ma be nwehia budnu kwó okwo. Kpam, nye ke kparu mkpuru nu nye ke gweru nhne n'ekwu jeenwekota snarnima. ³⁷ Nhne be kwuru bu ezi oka, ‘Otu badnu kpasiri mkpuru, nye berere ghoru mkpuru.’ ³⁸ M ziznenu m anu ghoru mkpuru n'ekwu ke anu rnuge ernu nu rime a. Ele berere rnurnu ernu, anu nwehia mbnarna n'ernu be.”

³⁹ Agida ele Sameria ele wu nu rime eli-ohna wam kweru nu Jizosi kwnornu nu nhne nwerinya wam kwuru, “O kanu m kpakara nhne me mernu.” ⁴⁰ Nga ele Sameria vakwnusiri a, be riasno a ma ya nu be daziri, Jizosi daziri pii obochi lawuru. ⁴¹ Agida ele berere kweru kwnornu nu izi oma o znirni be.

⁴² Be kanu nwerinya wam, “A kweru kitna, o buo nu nhne i kannu ai, kovu kwnornu nu a nurnu nhne o kwuru, a magwu nu nye ka bu Nye Oznohia ke owa n'ezi.”

Jizosi gworu nnwo rukna nye risi

⁴³ Nga obochi lawuru wam whemernu, o whoga pii zne Galili. ⁴⁴ Jizosi n'iwhuru a karu, “Nye owhnurninya nwée igwugwu n'eli a.” ⁴⁵ Nga o

vaduru ẹlì Galili, ele zì nù Galili naakweru a kwnornu nù be znernu Iriri Ọgawhe nù Jeruselem, be whnũrnu kpakara nhne o mernu n'Iriri Ọgawhe wam.

⁴⁶ Jizọsi lahnà nù Kana ke Galili hne o mernu mini ghọ manya. Otu nye risi ọchichi ke nnwọ a rukna zì n'ẹhni igbugbu nù Kapanom. ⁴⁷ Nga ọ nũrnu nù Jizọsi hiri nù Judiya va Galili, o znekwnusi a, kanu a, ọ va gwọ nnwọ a rukna ẹhni igbugbu, nye zì n'ọnu ẹnwu.

⁴⁸ Jizọsi kanu a, “Anu jéekweru kwekolam ma anu whnũrnu ẹrnu ndu-ẹhni nù ẹrnu rikne.”

⁴⁹ Nwerukna wam kaa, “Nda-aị-kwu, snornu m zne, ọ zì nnwọ m nwu.”

⁵⁰ Jizọsi kanu a, “La, nnwọ ị rukna zì bụdnu.”

Nwerukna wam kweru nhne Jizọsi kanu a, la. ⁵¹ Nga ọ zì n'apna, ele izi a kwnusi a, kanu a, “Nnwọ ị rukna zì bụdnu.” ⁵² Ọ sịkwa be ige ẹhni bụru nnwọ a rukna oma, be kanu a, “N'otnu-ige ke mbom n'iwhehnie† n'ekile wheru ewhe, ẹhni orne bẹkwnu wam sịgbasiri a.”

⁵³ Nda nnwọ wam chenwanya nù ọ bụ ige wam Jizọsi kannu a, “Nnwọ ị rukna zì bụdnu.” Kam kpayaru, ya nù kpakara ele ọro a kweru.

⁵⁴ Ka bụ ẹrnu ndu-ẹhni ke ẹbo Jizọsi rnũrnu nga o hiri nù Judiya va Galili.

5

Ọgwugwo n'Olulu Mini
Betisaida

† **4:52** Ọtnu-ige ke mbom n'iwhehnie: ọkwukwo ke mbom kwuru ige awa ke ẹsau

¹ Nga ka whemernu, Jizōsi znernu iriri ele Ju nū Jeruselem. ² Otu olulu mini zī ngeri Ōnu-Mgbo Atnūnu nū Jeruselem ke nwernu mgbemgbe ọro isne, ke ele Hiburu nookwu Bētizata. ³ Agida ele nrīria naadnanyī nū ngeri a, ele isni, nū ele mgworo, nū ele ngeri ẹhni be dōnwurnu ọdonwu. [Be zī neese ma be gbarū mini wam. ⁴ Kwnornu nū enine izi Nyenwe aī neehiedna hite n'ige dū n'ige gbarū mini wam. Nye nrīria ọbula ke беру ọsno dnabna nū rime mini wam nga enine izi gbarūkparu a, ẹhni a jọoburu ọma hite nū nrīria ọbula ọ naaria.] ⁵ Otu nwerukna ke naaria nrīria nri awha ẹto nū ẹsato zī pīi. ⁶ Nga Jizōsi whnūnu a hne ọ dnanyī, ọ mahiari nū ọ zī nū nrīria gbu ọkwnu, ọ sīkwa a, “Ị piuru be gwọ ị nrīria ị?”

⁷ Nye nrīria wam sarū a, “Nda-aī-kwu, m nwée m nye jeeyisi m nū rime olulu mini nga be gbarūru mini, kpa me neezne, nye berere беру m ọsno dnabna.”

⁸ Jizōsi kanū a, “Lizọ, chīri etere i, zne izne.”
⁹ Ngangam, be gwọru nwerukna wam. Ọ chīri etere a, zne izne.

Nhne ka mernu n'Ọbochi Ozukwa Inwe. ¹⁰ Ka mernu ele Ju kanū nwerukna wam Jizōsi gwọru nrīria, “Tna bụ Ọbochi Ozukwa Inwe, o megid-nernu n'iwu nū ị nẹechiri etere ị.”

¹¹ Nwerukna wam sarū be, “Nwerukna ke gwọru m nrīria kannū m, ‘Chīri etere i, zne izne.’”

¹² Be sīkwa a, “Nyele bụ nye ke karū jī chīri etere i zne izne?”

¹³ Kòvú nù nwerukna wam be gwòru máa nye Jizòsi bù, kwnornu nù Jizòsi bnanam n'esilawùru igbudu badnù wam whòga.

¹⁴ Omekwo, Jizòsi piohiaru a n'Oro Nsò Chiokike, ò kanù a, “Le, be gwòru ì nrìria ì, ì méma mmehie, ò zì nhne òjò ke kakwo ka dnakwasì ì.” ¹⁵ Nwerukna wam whòga kanù ele risi ele Ju nù ò bù Jizòsi gwòru a nrìria a.

Bùdnu hi nù Nnwò Chiokike

¹⁶ Ele Ju bete o mekpa Jizòsi èhni kwnornu nù ò gwòru nrìria n'Òbochi Ozukwa Inwe. ¹⁷ Jizòsi kanù be, “Nda m nòornu èrnu kpakara ige, ò bù masì kpa me nòornu.” ¹⁸ Ikwu-ònu ka mernu ele risi ele Ju ovu owe èhni k'agìda, be noopiosi rikne o gbu Jizòsi, ò búo nù o luluru Òbochi Ozukwa Inwe be kpòì, kòvú nù ò karù nù Chiokike bù Nda a, naakaa nù ya nù Chiokike hna n'otu.

¹⁹ Jizòsi kanù be, “Me kanù ezi òka, ò zà nhne ke Nnwò nwernu rikne o mee n'èhni a, kòvú o neeme nhne ò whnùrnu Nda a neeme. Kwnornu nù Nnwò nòornu nhne Nda a nòornu. ²⁰ Nda whnùrnu Nnwò a n'anya, neegesi a kpakara nhne o neeme. Ò jeegesi a nhne ke kakwo ka ke jaagbagwoji anù anya. ²¹ Lele kpa Nda neeme ele nwùrnu ònwu hi n'ènwu lizò, nyee be bùdnu, ò bù masì kpa Nnwò neenye ele masìri a bùdnu. ²² Nda zà neekpe nye òbula ikpe, kòvú o yisiri kpakara ikpe n'aka Nnwò a, ²³ ma kpakara ele badnù sòbisinu Nnwò a lele kpa be nòosobisinu Nda. Nye òbula ke zà nòosobisinu Nnwò, zà nòosobisinu Nda nye ziyaru a.

24 “Me kanụ anụ ezi ọka, nye ọbula ke nọonu ikwu-ọnu m kweru nụ nye wam ke ziyaru m, nwernu budnu kwó okwo. Be jáama a ikpe, kọvu o hilem n'ẹnwu whe nụ budnu. 25 Me kanụ anụ ezi ọka, ige vawa, ige wam valẹm masị, nga ele nwurnu ọnwu jọonu nkọli ke Nnwọ Chiokike, ele nurnu a jaazi budnu. 26 Kwnornu lele kpa Nda nwernu budnu nụ rime a, ọ bụ masị kpa o mernu Nnwọ nwernu budnu nụ rime a. 27 O nyernu Nnwọ rikne o kpe ikpe, kwnornu nụ ọ bụ Nnwọ ke Badnu.

28 “Ọ gbágwọji anụ anya nụ ige vawa, nga ele zị n'ilili jọonu nkọli a, 29 be jeehi n'ilili lizọ, ele mernu mma jeelizọ n'ẹnwu ziri budnu, ele mmehie jeelizọ n'ẹnwu bụru ele be jaama ikpe.

30 “M nwée m rikne mee nhne ọbula nụ rikne ke aka m. M neekpe ikpe kpa Nda m kannu m me kpe. Ka neegesi nụ ikpe m zị snam, kwnornu nụ m zá neeme nhne me pioru, kọvu kwekọlam nhne nye ziyaru m pioru.

Akebne gbasiri Jizọsi

31 “Ọ bụru nụ me naagbanu ẹhni m akebne, akebne m bụo ezi. 32 Kọvu ọ zị nye naagbanu m akebne, m magwu m nụ akebne a zị kwem. 33 Anụ ziznenu ele izi znekwnusi Jóni, o kwuru nhne gbasiri ezi ọka. 34 Ka zá neegesi nụ m neegweru akebne ke badnu, m nookwu nhne ka ma anụ nwehia ọznohia. 35 Jóni nụ lele tọnji ke noonwu, nọomuke, anụ kpebiri ọ nwudna ige matị n'iwhe a.

36 “M nwernu m nhne akebne ke kakwo akebne Jóni gbarụ. M nọornu ẹnu ke Nda m nyernu m, ẹnu wam naagbanu m akebne, neegesi nụ Nda m ziyaru m. 37 Nda m nye ziyaru m naagbanu m

akebne. Anụ nùlele nkòli a mọbu whnụ ruwhnu a. ³⁸ Anụ zá naabita ikwu-ọnu a nụ mkpoma anụ, kwnornu nụ anụ kwéle nụ nye wam o ziyaru. ³⁹ Anụ tusa ẹhni nyosna nhne be gbarụ n'okwukwo nsọ anụ, anụ neeche nụ anụ jeenwe budnu kwó okwo hite nụ nhne be gbarụ nụ rime a, be naagbanụ m akebne. ⁴⁰ Kọvu anụ kwé ọ vakwnusi m, ma anụ nwehia budnu kwó okwo.

⁴¹ “M zá m nanarnụ ọznarni hite n'aka badnụ. ⁴² M magwụ m anụ, anụ nwée ọwhnun'anya Chiokike nụ mkpoma anụ. ⁴³ M ji m rẹwhna Nda m va, anụ kwége m, kọvu ọ bụru nụ nye berere jiri rẹwhna a va, anụ jeegweru a. ⁴⁴ Ndaa kpa anụ jeekwe, hne anụ noopio ọznarni ke badnụ, kọvu anụ nwée rikne pio ọznarni ke hi n'aka nye ke bụ Chiokike kpọi va.

⁴⁵ “Anụ chékọ nụ m joobno anụ nhne nụ ruwhnu Nda m. Kọvu ọ bụ Mozizi nye anụ kwnataru mkpoma, joobno anụ nhne. ⁴⁶ Ọ bụru nụ anụ kweruru Mozizi n'ezi, anụ jeekweru m, kwnornu nụ ọ gbarụ nhne gbasiri m. ⁴⁷ Kọvu hne anụ kwége nhne Mozizi gbarụ n'okwukwo nsọ, ndaa kpa anụ jeekweru nhne me nookwu?”

6

*Jizọsi nyernu pokwu
badnụ isne wiri*

(Mat 14:13-21; Mak 6:30-44; Luk 9:10-17)

¹ Nga ka mekworu, Jizọsi whe aznụ Osimini Galili (ka bụ Osimini Taberasi). ² Agida ele badnụ snornu a, kwnornu nụ be whnurnu ẹnu ndu-ẹhni ọ rnurnu, nga ọ gwọru ele nrịria. ³ Jizọsi pnezne n'olu

rugwu daziri ẹli, ya nù ele sno apna a. ⁴ Ige Iriri Ọgawhe ele Ju zì ndundu.

⁵ Nga Jizọsi lehnataru anya whnu agida ele badnu naavakwnusi a, o kanu Filipu, “Ndaa hne a ọozuya wiri a jeenye igbudu ele ka?” ⁶ Ka bu ma o kpa Filipu iru, kwnornu nu o magwu nhne o jeeme.

⁷ Filipu saru a, “O buru nu a zu bredi riwhu mkpuru iwai lawuru, o jeezu ma nye obula ri mati mati.” ⁸ Otu nu rime ele sno apna a, Anduru, nwe ne rukna Saimoni Pita, kaa, ⁹ “Otu wikoro mati zi hna nye ji ike bredi balı* isne nu aznu mati mati lawuru. O za nhne kam bu n'esilawuru igbudu ele badnu ka.”

¹⁰ Jizọsi kanu be, “Anu kanu be daziri ẹli.” Agida achara zi pi. Kpakara ele badnu wam daziri ẹli, be hna lele pokwu ele rukna isne. ¹¹ Jizọsi gweru bredi wam, tu mmamma, nyee kpakara ele wam dazigwu ẹli. O gweru aznu wam mee kwno kpm. Be ri, riji ruwho be.

¹² Nga be rikworu, Jizọsi kanu ele sno apna a, “Anu tutukota kpakara ruvnuruvnu ke gwnarnu, o za ke whu.” ¹³ Be tutukota kpakara ruvnuruvnu a, ke jiri nri nu nkita lawuru hite n'ike bredi balı isne wam ke ele badnu riri.

¹⁴ Ele zi nga Jizọsi rnurnu ernu ndu-ehni ka karu, “N'ezi oka, ka bu nye owhnurninya wam ke jaava n'owa.” ¹⁵ Nga Jizọsi whnuru nu be noopio o chni a eze nu rikne, o hi n'esilawuru be whoga, ya nu nsnu a zne n'olu rugwu.

* **6:9** balı Ka bu ikpa be ji neeme bredi.

*Jizọsi znernu izne
n'olu mini*

(Mat 14:22,33; Mak 6:45-52)

¹⁶ N'ogbednachi, ele sno apna a zne osimini.
¹⁷ Be bna n'ogbo neewhe aznụ osimini kiyari neezne Kapanom. Jizọsi yáavage hne be zị tem dụ n'abali. ¹⁸ Okne ruwhere nụ abaka-mini neewhe n'olu mini. ¹⁹ Ele sno apna a kwọ ogbo nhne nụ lele maiịlị ẹto mọbu ẹno nga be whnurnu Jizọsi naavakwnusi be, neezne izne n'olu mini. Be tų ogwnu k'agida. ²⁰ Kọvu Jizọsi kanụ be, “Anụ tųko ogwnu, ọ bụ mawa.” ²¹ Be kweru a, ọ bnakwnusi be nụ rime ogbo, ngangam ogbo be dụ n'ẹli wam be neezne.

Ele badnụ noopio Jizọsi

²² N'ekile a, agida ele badnụ ele zị n'aznụ osimini kiyari mahiaru nụ otu ogbo matị zị pị whogalam vuru ele sno apna Jizọsi kpọi. Jizọsi snóge be. ²³ Ogbo ele ke berere hiri nụ Taberasị va nụ ngeri hne ele badnụ wam riri brẹdi, nga Nyenwe aị tųkparu mmamma. ²⁴ Nga ele badnụ wam whnurnu nụ Jizọsi zila pị, ma ele sno apna a, be bna n'ogbo wam zne Kapanom noopio Jizọsi.

Jizọsi bụ Wiri ke Bụdnụ

²⁵ Nga ele badnụ wam whnurnu a n'aznụ osimini kiyari, be sịkwa a, “Nye-zni-nhne, ndaa nga ị varu hna?”

²⁶ Jizọsi saru be, “Me kanụ anụ ezi oka, anụ noopio m kwnornu nụ anụ rijiri ruwho nụ brẹdi me nyernu anụ, ọ bụo kwnornu nụ anụ whnurnu ẹnu ndu-ẹhni. ²⁷ Anụ dógbu ẹhni anụ n'ẹnu kwnornu nụ wiri ke nooro oro, tnunuma, anụ dógbu ẹhni anụ

n'ernu kwnornu nù wiri ke jaazì tem dù budnu kwó okwo, ke Nnwọ ke Badnù neenye anù. Ya bù nye Chiokike nyernu rikne o mee kpam.”

²⁸ Be sịkwa Jizọsi, “Kini bù nhne a jeeme ma a rnù ẹrnu Chiokike?”

²⁹ Jizọsi sarù be, “Ka bù ẹrnu Chiokike, anù kweru nù nye wam o ziyaru.”

³⁰ Be sịkwa a, “Kini bù ẹrnu ndu-ẹhni i jeeji gesi ma a whnurnu, kweru? Kini bù nhne i jeeme? ³¹ Ele nda aị ọknani riri mana n'ẹli chna chna chna, lele kpa ọkwukwo nsọ kwuru, ‘O nyernu be brẹdi ke hi n'oligwe va, be ri.’ ”

³² Jizọsi kanù be, “Me kanù anù ezi ọka, ọ búo Mozizi nyernu anù brẹdi ke hi n'oligwe va, kọvu Nda m neenye anù ezi brẹdi ke hi n'oligwe va. ³³ Kwnornu nù brẹdi ke Chiokike neenye bù nye wam ke hi n'oligwe va, bù nye neenye ele ọwa budnu.”

³⁴ Be kaa, “Nda-aị-kwu, neenye aị brẹdi ka kpakara ige.”

³⁵ Jizọsi kanù be, “Mawa bù brẹdi ke neenye budnu, nye vakwnusiri m, wiri jọogwnu a rịa rịa, nye kweru nù me, akpịri jọokpo a bẹkwnu rịa rịa.

³⁶ M karù m, anù whnurnu m, kọvu anù kwége.

³⁷ Nye ọbula ke Nda m nyernu m jaavakwnusi m, m jáachihala a rịa rịa. ³⁸ Kwnornu nù m hiri m n'oligwe hiedna mee echiche nye ziyaru m,

ọ búo o mee echiche m. ³⁹ Ka bù echiche nye ziyaru m, me túwhu nye ọbula ke o nyernu m, kọvu me mee ma be hi n'ẹnwu lizọ n'ọbochi ipne-aznù.

⁴⁰ Kwnornu nù ka bù nhne Nda m noopio, nye ọbula ke jọowhnu Nnwọ wam, kweru nù a, jeenwe

budnu kwó okwo, m jeeme nye wam hi n'ẹnwu lizo n'ọbochi ipne-aznu.”

⁴¹ Ele Ju bete ọ takpo megidne a, kwnornu nu ọ karu, “Mawa bu Brẹdi ke hiednarnu n'oligwe.”

⁴² Be kaa, “Nye ka ọ bụo Jizọsi nnwọ Josefu? A magwu nda a nu nne a, ndaa kpa ọ naakaa nu o hi n'oligwe hiedna?”

⁴³ Jizọsi kanu be, “Anu takpoma n'esilawuru ẹni anu. ⁴⁴ Ọ zá nye jaavakwnusi m okwolem ma Nda m nye ziyaru m jodoru a vakwnusi m, m jeeme o lizo n'ẹnwu n'ọbochi ipne-aznu. ⁴⁵ Ele ọwhnurninya gbaru a n'okwukwo nsọ, ‘Chiokike jeezni kpakara ele badnu nhne.’ Nye ọbula ke bnoteru Nda nsni muhia nhne n'aka a, jaavakwnusi m. ⁴⁶ Ọ zá nye ọbula ke whnueru Nda anya nu mbom, kwekolam nye wam ke hi hne Chiokike zi whnueru Nda anya. ⁴⁷ Me kanu anu ezi oka, nye ọbula ke kweru nwernu budnu kwó okwo. ⁴⁸ Mawa bu wiri ke budnu. ⁴⁹ Ele nda anu oknani riri mana n'eli chna chna chna, be nwu. ⁵⁰ Kọvu wiri ke hi n'oligwe hiedna, nye ọbula ke riri a, joonwu ẹnwu. ⁵¹ Mawa bu wiri ke zi budnu ke hi n'oligwe hiedna. Ọ buri nu badnu ọbula ri wiri ka, o jaazi budnu tim tom. Anọ-ẹni m bu wiri ke me jeenye ọwa ma be ziri budnu.”

⁵² Ka kpayaru odogbuta whuyaru n'esilawuru ele Ju. Be kaa, “Nwerukna ka, o jeenye ai anọ-ẹni a ma a ri?”

⁵³ Jizọsi kanu be, “Me kanu anu ezi oka, okwolem ma anu riri anọ-ẹni ke Nnwọ ke Badnu, nwọ ọvnarna a, anu jéenwe budnu nu rime anu. ⁵⁴ Nye ọbula ke jeeri anọ-ẹni m, nwọ masi ọvnarna m nwernu budnu kwó okwo. ⁵⁵ Kwnornu nu anọ-ẹni m bu wiri n'ezi, ọvnarna m bu masi nhne be

nwọ ọnwọ n'ezi. ⁵⁶ Nye ọbula ke jeeri anọ-ẹhni m, nwọ ọvnarna m, wu nụ rime m, m wu masị m nụ rime a. ⁵⁷ Lele kpa Nda ke zị bụdnu ziyaru m, m zị m bụdnu kwnornu nụ Nda m, kpam masị, nye ọbula ke jeeri anọ-ẹhni m jaazị bụdnu kwnornu me. ⁵⁸ Ka bụ wiri wam ke hi n'oligwe hiedna, ọ bụo kpa nda anụ ọknani riri mana be nwụ. Nye ọbula ke jeeri wiri ka jaazị bụdnu tim tọm.” ⁵⁹ Ka bụ nhne Jizọsi kwuru nga o neezni nhne nụ ọro ọgbako ele Ju zị nụ Kapanom.

*Ikwu-ọnu ke bụdnu
kwó okwo*

⁶⁰ Nga agịda ele sno apna a nurnu ọka a, be kaa, “Ikwu-ọnu ka siri rikne, nyele jeemeli a?”

⁶¹ Nga Jizọsi mahiari nụ ele sno apna a naatakpo gbasiri ọka ka, ọ kanụ be, “Ka o mernu ovu we anụ ẹhni sa? ⁶² Ndaa kpa ọ jọonu nga anụ jọowhnu Nnwọ ke Badnụ lahna hne ọ zị nụ mbom? ⁶³ Enine neenye bụdnu, badnụ etekne nwée rikne mee nhne ọbula. Ọka me nookwunu anụ bụ enine bụ masị bụdnu. ⁶⁴ Kọvu agwna anụ kwége.” Jizọsi magwụ hite n'oziri ele kwé ekwe nụ nye jeere a. ⁶⁵ Ọ kanụ be, “Ka kpayaru me jiri kanụ anụ nụ ọ zá nye jaavakwnusi m, okwolem ma Nda m nyernu a rikne o mee kpam.”

⁶⁶ Hite nụ nhne Jizọsi kwuru, agịda ele sno apna a lahna aznụ kwnornu nụ ikwu-ọnu ka, be snóge a berere. ⁶⁷ Jizọsi sịkwa nri nụ badnụ lawuru wam ele sno apna a, “Anụ jaalahna masị?”

⁶⁸ Saịmoni Pita, kaa, “Nyenwe aị, a jaalakwnusi nyele? I nwernu ikwu-ọnu ke neenye bụdnu kwó

okwo. ⁶⁹ Kítna, a kweru, mahía masí nù ì bú nye nsò ke Chiokike.”

⁷⁰ Jizòsi kanù be, “Me hòhiaru anù nri nù ẹbo, kọvu otu nyenum nù rime anù bú ekwensu.” ⁷¹ O nookwu gbasíri Judasí, nnwọ Saimoni Isikarioti, kwnornu nù Judasí jeere a, ọ bú n'ezí nù ọ bú otu nù rime nri nù badnú lawùru wam ele sno apna Jizòsi.

7

Jizòsi nù rùmu nne a

¹ Nga ka mekworu, Jizòsi neezneghari nù rime Galili. Ọ chọla o zne Judiya kwnornu nù ele Ju noopio o gbu a. ² Ige Iriri Oro Igwugwu ele Ju zì ndundu. ³ Rùmu nne Jizòsi kanù a, “Whọga hna zne Judiya ma ele sno apna ì whnùrnu ẹrnu ì nọornu. ⁴ Nye pioru ma ele badnú mahía nye ọ bú rnù ẹrnu tugwaru otugwa. Mee ma ọwa whnùrnu ẹrnu ì nọornu.” ⁵ Rùmu nne a kwuru ka kwnornu nù be kwéle nù ya.

⁶ Jizòsi kanù be, “Ige m yóoduge, kọvu ige anù zì n'aka anù. ⁷ Ele ọwa jéenwe rikne sno anù iro, kọvu be snornu m irno, kwnornu nù m naakaa nù ẹrnu be búo ọma. ⁸ Anù zne n'Iriri ka, m jáava n'Iriri ka kítna, kwnornu nù ige m yóoduge.” ⁹ Nga Jizòsi kwukworu kpa, ọ dazìgidne nù Galili.

Jizòsi znernu Iriri Oro Igwugwu

¹⁰ Nga rùmu nne a znernu Iriri wam, Jizòsi snornu be zne Iriri wam nù mgwugwa, ọ búo nù ruwhnu ọhna. ¹¹ Ele Ju zì noopio a n'Iriri wam, be nẹsikwa, “Ndaa hne ọ zì?”

¹² Agida ele badnu ñotnurita n'esilawuru be, be naakaa, “O bu nye oma.” Ele berere naakaa, “Óza, o nooduwhu ele badnu.” ¹³ Kovu o zá nye nookwuhia nhne gbasiri a nu ruwhnu ohna, kwnornu nu be ñotu ogwnu ele risi ele Ju.

¹⁴ N'esilawuru Iriri wam, Jizosi znernu n'Oro Nso Chiokike bete neezni nhne. ¹⁵ Nhne o neezni jiri ele risi ele Ju anya, be kaa, “Nwerukna ka múlele nhne, ndaa kpa o jiri mahia nhne?”

¹⁶ Jizosi saru be, “Nhne me neezni buo ikwuonu ke m, kovu ke nye ziyaru m. ¹⁷ Nye obula ke jeeme echiche nye ziyaru m, nye wam jaamahia ma nhne me neezni ma o hi n'aka Chiokike mobu o hi n'aka ke m. ¹⁸ Nye nookwu nhne aka ke a, noopio igwugwu ke ehni a, kovu nye noopio igwugwu nye ziyaru a bu nye ezi oka, aghigho zila nu rime a. ¹⁹ O buo Mozizi nyernu anu iwu? Kovu o zá otu nu rime anu ke naabita iwu. Kini mernu anu noopio o gbu m?”

²⁰ Ele badnu wam kaa, “I bu nye renwu ojo nwugwu. Nyele noopio o gbu i?”

²¹ Jizosi kanu be, “M rnurnu m otu ernu ndu-ehni, o ji anu anya. ²² Mozizi nyernu anu iwu o kpa rumu anu nka (o bu n'ezi nu okpa nka hige n'aka Mozizi, kovu o hi n'aka ele gbaka), anu naakpa rumu anu nka n'Obochi Ozukwa Inwe. ²³ O buru nu anu naakpa rumu anu nka n'Obochi Ozukwa Inwe, ma anu bita Iwu Mozizi, ndaa kpa ovu ji neewe anu ehni kwnornu nu m gworu m nye nriria n'Obochi Ozukwa Inwe? ²⁴ Anu kpe ikpe hite nu nhne anya ñowhnu, kovu anu kpe ikpe buru oma.”

Jizosi, o bu ya bu Mezaya?

²⁵ Agwna ele zì nù Jeruselem kaa, “Ka ọ búo nye be noopio o gbu? ²⁶ Le, o nookwu ọka n'ọhna, ọ zá nye nookwu nhne ọbula megidne a. Ele risi aị be magwụ nù nye ka bụ Karaịsi n'ezì?”

²⁷ Kọvu nga Karaịsi jaava, ọ zá nye jaamahia hne o jeehi va. Kọvu kpakara aị magwụ hne nwerukna ka hi va.

²⁸ Kpa Jizọsi neezni nhne n'Oro Nsọ Chiokike, o gweru okne nkọli siwama lulo, kaa, “Anụ magwụ nye me bụ, anụ magwụ masị hne me hi va, kọvu m váge m nù rikne aka m, nye ziyaru m bụ ezi ọka. Anụ máa nye ọ bụ. ²⁹ Kọvu m maam nye ọ bụ, kwnornu m hi m hne ọ zì va, ya ziyaru m.”

³⁰ Be pio kpa be jọonwugwu a, kọvu ọ zá nye tųkwasiri a aka, kwnornu nù ige a yóoduge. ³¹ Kọvu agịda ele badnụ n'esilawuru igbudu badnụ wam kweru nù ya, be kaa, “Nga Karaịsi jaava, ọ jọornu ẹrnu ndu-ẹhni kakwo ke nwerukna ka nọornu?”

Be ziznenu ele nse be nwudne Jizọsi

³² Ele Farisi nurnu nhne igbudu ele badnụ wam nookwu gbasiri a, be nù ele risi ariọhna zizne ele neese Oro Nsọ Chiokike ma be nwugwu Jizọsi.

³³ Jizọsi kaa, “Me nù anụ jaazị ige matị, omekwo, m lakwnusi nye ziyaru m. ³⁴ Anụ joopio m, anụ jóowhnu m, kwnornu nù anụ jéenwe rikne va nhne me naala.”

³⁵ Ele risi ele Ju sịkwa ẹhni be kaa, “Ndaa hne o jeezne hne a jóopiohịali a? O jeezne hne ele Ju wu n'esilawuru ele Giriki, zni ele Giriki nhne? ³⁶ Kịni bụ risi nhne o nookwu? Ọ karụ, ‘Anụ joopio m, kọvu anụ jóowhnu m, hne me neezne anụ jéenwe rikne va.’ ”

Osimini ke neenye bɔɖnu

³⁷ N'okne ɔbochi ipne-aznɔ ke Iriri wam, Jizɔsi gwuzoru, gweru okne nkɔli siwama, kaa, “Nye ɔbula ke akpɔri nɔokpo bɛkwɛnu, ɔ vakwnusi m, nwɔrnu mini. ³⁸ Lele kpa ɔkwukwo nsɔ kwuru, ‘Nye ɔbula ke kweru nɔ me, osimini ke mini bɔɖnu jeehi nɔ rime ruwho a naagbahia.’ ” ³⁹ Jizɔsi kwuru ka kwnornu nɔ Enine Nsɔ ke ele kweru nɔ ya jaanahia. N'ige wam be ɛnyene Enine Nsɔ, kwnornu nɔ be ɛnyene Jizɔsi igwugwu.

Okewa n'esilawuru ele badnɔ

⁴⁰ Agwna ele zɔ n'igbudu ele badnɔ wam, nga be nurnu ikwu-ɔnu ka, be kaa, “N'ezi, nwerukna ka bu nye ɔwhnurninya wam.”

⁴¹ Ele berere kaa, “O bu Karaɔsi.”

Kɔvu ele berere kaa, “Karaɔsi o jeehi nɔ Galili va? ⁴² ɔkwukwo nsɔ kwuru nɔ Karaɔsi jeehi nɔ avnurnu Devidi va, nɔ be joomu a nɔ Bɛtilehem, ɛli-ɔhna hne Devidi wuru.” ⁴³ Ka kpayarɔ okewa n'esilawuru igbudu ele badnɔ wam kwnornu nɔ Jizɔsi. ⁴⁴ Agwna be pioru ɔ nwudne a, kɔvu ɔ zɔ nye tukwasiri a aka.

Ókwe ekwe ke ele risi ele Ju

⁴⁵ Omekwo, ele neese Ọro Nsɔ Chiokike lahnakwnusi ele risi ariohna nɔ ele Farisi, be sɔkwa be, “Kini mernu anɔ nwɔyagele a?”

⁴⁶ Ele nse wam sarɔ be, “O zɔ nye kwuleru ɔka lele kpa nwerukna ka kwuru.”

⁴⁷ Ele Farisi sɔkwa be, “O duhie masila anɔ sa?”

⁴⁸ O nwernu otu nye Farisi mɔbu ele risi ele Ju ke

kweru nù ya sa? ⁴⁹ Ele ka máa nhne ọbula gbasiri iwu, ọvu ọnu Chiokike zì nù risi be.”

⁵⁰ Otu nye Farisi rẹwhna a bụ Nikodimosi, nye znekwnusiri Jizọsi n'abalị, kanụ be, ⁵¹ “Iwu aị zá naama badnụ ikpe sị ọ nuna nhne hi n'ọnu a, nù nhne o mernu.”

⁵² Be saru a, “Ị bụ masị nye Galili sa? Lekasi nù nhne be gbaru n'ọkwukwo nsọ, ọ zá nye ọwhnurninya ke hi nù Galili whuya.”

[⁵³ Be gbasa, nye ọbula la n'oro a.

8

Nwerinya be nwugwuru

n'oyi

¹ Jizọsi znernu nù Rugwu Olivu. ² N'ọnu ọsisi, ọ lahna n'Oro Nsọ Chiokike, kpakara ele badnụ gba a gburugburu, ọ daziri ẹli bete neezni be nhne. ³ Ele zni iwu ele Ju nù ele Farisi kwuyanụ a otu nwerinya be nwugwuru n'oyi, be gwuzote a n'esilawuru be. ⁴ Be kaa, “Nye-zni-nhne, a nwugwuru nwerinya ka hne ya nù nyerukna dnanyi. ⁵ N'iwu aị, Mozizi karu be gweru akaworugwu tugbu a. Kini bụ nhne i kwuru?” ⁶ Be kwuru ka naakpa a iru ma be bno Jizọsi nhne.

Kọvu Jizọsi whudnahie ẹli gweru mkpaka a gba nhne nù rịzna. ⁷ Be zì kọriri neesikwa a, o lizọ, kanu be, “Nye ọbula n'esilawuru anu ke mékọlele mmehie beru ọsno tu a akaworugwu.” ⁸ O whudnahie ẹli berere naagba nhne nù rịzna.

⁹ Nga be nurnu a, be hite nù nye okno badnụ du nù nye matị, otu otu be whoga kwo. Ọ gwnata Jizọsi nù nwerinya wam. ¹⁰ Jizọsi lizọ, sịkwa a,

“Nwerinya, ndaa ele noobno i nhne? O zá nye gwnarnu ke jaama i ikpe?”

¹¹ Nwerinya wam kaa, “O zá, su Nda-aí-kwu.”

Jizosi kanu a, “M máge m masi m ji ikpe, kovu la, i méma mmehie berere.”]

Jizosi, iwhne ke owa

¹² Jizosi kakwnonu be, “Mawa bu iwhne ke owa. Nye obula ke joosno m jeenwe iwhne ke budnu, o jeezne izne n'ochichiri.”

¹³ Ele Farisi kaa, “I naagbanu ehni i akebne kitna, nhne i nookwu buo ezi oka.”

¹⁴ Jizosi saru be, “O bubedi nu m naagbanu ehni m akebne, nhne me nookwu bu ezi oka, kwnornu nu m magwu m hne me hi nu hne me neezne.

¹⁵ Anu neekpe ikpe lele badnu. M zá m neekpe nye obula ikpe. ¹⁶ O buru nu me kpe ikpe, ikpe m ziri ezi kwnornu nu me nu nsunu m zá n'ikpe, me nu Nda m nye ziyaru m zi. ¹⁷ Be gbaru a n'iwu anu, nu akebne badnu lawuru gbaru bu ezi oka. ¹⁸ M gbanu m ehni m akebne, Nda m nye ziyaru m gbakwnonu m akebne.”

¹⁹ Be sikwa a, “Ndaa hne Nda i zi?”

Jizosi saru be, “Anu máa m, anu máa masi Nda m. O buru nu anu magwu nye me bu, anu znernu amahia Nda m.” ²⁰ Jizosi kwuru kpakara nhne ka nga o neezni nhne n'Oro Nso Chiokike, nu rime hne be naabita igbe iwai. O zá nye tukwasiri a aka megidne a kwnornu nu ige a yaavage.

Anu jeezneli hne me neezne

²¹ Jizòsi kanụ be berere, “M jaala, anụ joopio m, anụ jọonwu nụ rime mmehie anụ. Anụ jéenwe rikne va hne me jaala.”

²² Ele risi ele Ju kaa, “Ọ kaa nụ a jáavali hne ọ naala. O joogbu ẹhni a sa?”

²³ Jizòsi kanụ be, “Anụ hi hna, kọvu m hi m n'olu va. Anụ bụ ele ọwa ka, kọvu m búo m nye ọwa ka. ²⁴ Ọ bụ nhne me jiri kanụ anụ nụ anụ jọonwu nụ rime mmehie anụ. Ọ bụru nụ anụ kwége nụ m bụ m nye me bụ, anụ jọonwu nụ rime mmehie anụ.”

²⁵ Be sịkwa a, “Ị bụ nyele?”

Jizòsi kanụ be, “M bụ m nye me karụ nụ m bụ m n'ọziri. ²⁶ M nwernu m agịda nhne me jookwu n'ikpe megidne anụ. Kọvu nye ziyaru m bụ ezi ọka, m jaakanụ ọwa nhne me nurnu hite n'ọnu a.”

²⁷ Be ghóyage nhne o nookwu gbasiri Nda. ²⁸ Ka kpayarụ, Jizòsi kannụ be, “Nga anụ jeegwelizọ Nnwọ ke Badnụ olu, ige wam anụ jaamahia nụ m bụ m nye me bụ. Ọ zá nhne ke me neeme nụ rikne aka ke m, kọvu m neezni kpakara nhne Nda m znirni m. ²⁹ Nye wam ziyaru m dagwunu m, ọ ghárula me nụ nsnunu m rịa rịa, kwnornu nụ m neeme nhne naamasị a kpakara ige.” ³⁰ Agịda ele nurnu nhne Jizòsi kwuru kwere nụ ya.

Badnụ nwernu ẹhni a n'ezi

³¹ Jizòsi kanụ ele Ju ele ke kwere nụ ya, “Ọ bụru nụ anụ dazigidne n'ikwu-ọnu m, anụ jọoburu ele sno apna m n'ezi. ³² Anụ jaamahia ezi ọka, ezi ọka wam jeeme anụ nwernu ẹhni anụ.”

³³ Be sarụ Jizòsi, “A bụ rụmu Ebereham, a búkolele ọhi n'aka badnụ ọbula. Ndaa kpa ị naakaa nụ a jeenwernu ẹhni aị?”

³⁴ Jizọsi saru be, “Me kanu anu ezi oka, nye obula ke neeme mmehie bu ohi ke mmehie. ³⁵ Ohi za naadazigidne n'oro tim tom, kovu nnwo nwe oro okwnukokwnu. ³⁶ O bu ru nu Nnwọ jeeme anu nwernu ehi anu, anu jeenwernu ehi anu n'ezị. ³⁷ M magwu m nu anu bu rumu Ebereham, kovu anu noopio o gbu m, kwnornu nu anu kwége ikwu-onu m. ³⁸ M naakanu anu nhne Nda m gesiri m, kovu anu neeme nhne nda anu kannu anu.”

³⁹ Be saru a, “Ebereham bu nda ai.”

Jizọsi kanu be, “O bu ru nu Ebereham bu nda anu n'ezị, anu joonu ọnu Ebereham ruru. ⁴⁰ Nhne me mernu bu o kanu anu ezi oka me nuru n'onu Chiokike, anu noopio o gbu m. Ebereham méne kpam. ⁴¹ Anu neeme nhne anu nda anu mernu.”

Be kaa, “Chiokike bu Nda a nwernu kpọi. A buo rumu ọyi.”

Rumu ke Ekwensu

⁴² Jizọsi kanu be, “O bu ru nu Chiokike bu Nda anu n'ezị, anu zernu ọwhnu m n'anya, kwnornu nu m hi m hne Chiokike zi whuya, va hna. M vage m nu rikne aka ke m, kovu ya ziyaru m. ⁴³ Nhne mernu anu ghoyage nhne me nookwu, o bu nu anu bnoge nsni n'ikwu-onu m. ⁴⁴ Anu bu rumu nda anu Ekwensu, anu joonu ọnu nda anu noopio. O bu nye noogbu badnu hite n'opanizo. O zila n'ezị oka, kwnornu nu ezi oka za nu rime a. Omen'eli a bu o gha aghalaghala, kwnornu nu o bu nye aghalaghala nu nda kpakara aghalaghala. ⁴⁵ Me nookwunu anu ezi oka, kovu anu za neekweru m. ⁴⁶ Nyele n'esilawuru anu jaama m ikpe mmehie? O bu ru nu me kanu anu ezi oka, kini mernu anu

kwége m? ⁴⁷ Nye ọbula bú ke Chiokike joobno nsni ikwu-ọnu Chiokike. Kọvu anụ jóobno nsni kwnornu nụ anụ búo ele ke Chiokike.”

Jizọsi nụ Ebereham

⁴⁸ Ele Ju sarụ Jizọsi, “A kwukwaru nkari nga a kwuru nụ i bú nye Sameria ke renwu ojo nwụgwu.”

⁴⁹ Jizọsi kanụ be, “Ọ zá renwu ojo nwụgwu m, kọvu m neenye Nda m igwugwu, kọvu anụ zá neenye m igwugwu. ⁵⁰ M zá m noopio igwugwu ke m. O nwernu nye ke noopio igwugwu m, nye wam bú nye ikpe. ⁵¹ Me kanụ anụ ezi ọka, ọ búru nụ nye ọbula bita ikwu-ọnu m, ọ jọowhnu ẹnwu anya rịa rịa.”

⁵² Ele Ju kanụ a, “Kịtna hne a mahiaru nụ renwu ojo nwụgwu i. Ebereham nụ kpakara ele ọwhnurninya nwurnu ẹnwu. I zị hna naakaa nụ nye ọbula ke jaabita ikwu-ọnu i jónwu ọnwu rịa rịa. ⁵³ Nda aị Ebereham nwurnu ẹnwu. I kákwole Ebereham nụ ele ọwhnurninya ele nwurnu ẹnwu. I che nụ i bú di nyele?”

⁵⁴ Jizọsi sarụ, “Ọ búru nụ me nyee ẹhni m igwugwu, ọ zá nhne ọ bú. Nda m nye anụ naakaa nụ ọ bú Chiokike anụ neenye m igwugwu. ⁵⁵ Ọ bú n'ezi nụ anụ máa nye ọ bú rịa rịa. Kọvu m maam nye ọ bú. Ọ búru me kaa nụ m máam nye ọ bú, m jọoburu nye aghalaghala lele anụ, kọvu m magwu m nye ọ bú, m naabita ikwu-ọnu a. ⁵⁶ Nda anụ Ebereham nwernu ovu ọso n'ọnu nụ ọ jọowhnu ọbochi m, ọ whnụ masị a, ọ nwụdnarnu.”

⁵⁷ Ele Ju kanụ a, “I yóoduge nri awha isne, i whnurnu Ebereham n'ezi?”

⁵⁸ Jizọsi kanụ be, “Me kanụ anụ ezi ọka, m zị m sụ be mụnnu Eberham.” ⁵⁹ Be chiri akaworugwu be jootugbu a, kọvu Jizọsi tugwa ẹhni a, hi n'Oro Nso Chiokike whọga.

9

Jizọsi gwọru nye be mụnnu n'isni

¹ Kpa Jizọsi neewhe, ọ whnụ otu nyerukna be mụnnu n'isni. ² Ele sno apna a sịkwa a, “Nye-zni-nhne, ọ bụ mmehie nyele mernu be mụnnu nwerukna ka n'isni? Mmehie ke a sọbu ke ele mụnnu a?”

³ Jizọsi kaa, “Isni kpuru a bụo kwnornu nụ mmehie ke a mobu ke ele mụnnu a. Kọvu o kpuru isni ma ẹnnu Chiokike whuya iwhne n'ẹhni a. ⁴ A jaazi nọornu ẹnnu nye wam ziyaru m kpa ọbochi gwnarnụ, kwnornu nụ abali vawa, nga ọ zá nye jeenwe rikne rnụ ẹnnu. ⁵ Kpa me ziko n'ọwa, mawa bụ iwhne ke ọwa.”

⁶ Nga o kwukworu ka, ọ gbasa ọnu-mini n'eli, gweru ọnu-mini wam me ọrura, o te ọrura wam n'anya nwerukna wam. ⁷ Ọ kanụ a, “Zne snụ ruwhnu i n'Olulu Mini Sailom” (ke bụ nye be zizn-ernu). Nwerukna wam zne, snụ ruwhnu a, hiehna nọowhnu ọsno.

⁸ Ele agbatibi a nụ ele whnurnu hne ọ nọorio nhne nụ mbom sịkwa, “Ka ọ bụo nwerukna wam dazi ẹi nọorio nhne?”

⁹ Agwna be kaa, “Ọ bụ ya.”

Ele berere kaa, “Ọza, o yiri ya.”

Kọvu nwerukna wam karu, “Ọ bụ mawa.”

¹⁰ Be sịkwa a, “Ndaa kpa anya i jiri kpume?”

¹¹ Ó saru, “Otu nwerukna be kwu Jizosi mernu orura tesi n'anya m, kanu m, ‘Zne n'Olulu Mini Saïlom snu ruwhnu,’ kpa me snurnu, m whnurnu m osno.”

¹² Be sikwa a, “Nda hne o zi?”

Ó kaa, “M máam.”

*Ele Farisi notule
ogwugwo wam*

¹³ Be kwuznenu ele Farisi nwerukna wam kpuru isni nu mbom. ¹⁴ Jizosi mernu orura kpume anya nwerukna wam n'Obochi Ozukwa Inwe. ¹⁵ Ele Farisi sikwa nwerukna wam berere kpa o jiri notwhnu osno. Ó kanu be, “O yisiri orura n'anya, m snu ruwhnu m, kitna, m notwhnu osno.”

¹⁶ Agwna ele Farisi kaa, “Nwerukna ka híge nu hne Chiokike zi va, kwnornu nu o zá naabita iwu ke Obochi Ozukwa Inwe.”

Ele berere kaa, “Ndaa kpa nye mmehie jeenwe rikne rnu ernu ndu-ehni ele ka?” Ka vuyaru okewa n'esilawuru be. ¹⁷ Ele Farisi sikwa kwno nwerukna wam berere, “Ndaa nhne ikwuru gbasiri nye wam kpumernu anya i?”

Ó saru be, “Ó bu nye owhnurninya.”

¹⁸ Kovu ele risi ele Ju kwége nu o kpuru isni nu mbom kovu notwhnu osno kitna tem be sukwu ele murnu nwerukna wam. ¹⁹ Be sikwa be, “Ka o bu nnwo anu, nye anu karu nu o kpuru isni nga anu murnu a? Ndaa kpa o jiri notwhnu osno kitna?”

²⁰ Ele murnu a saru be, “Ó bu n'ezi nu o bu nnwo ai, nye a murnu n'isni. ²¹ Kovu a máa kpa o jiri notwhnu osno kitna mobu nye kpumernu anya a. Anu sikwahia a, o bu okno badnu, o jookwulinu ehni a.” ²² Ele murnu a kwuru ka kwnornu nu be

nootu ogwnu ele risi ele Ju. Kwnornu nù ele risi ele Ju kwekòtaru nù nye òbula ke jookwuhia nù Jizòsi bù Karaìsi, be jaachìhala a n'òro ògbako ele Ju. ²³ Ka kpahiaru ele murnu a karu, “Ò bù okno badnu, anu sika a.”

²⁴ Be sukwu kwno nwerukna wam be murnu n'isni, be kanu a, “Nyee Chiokike oznarni, a magwu nù nwerukna ka bù nye mmehie.”

²⁵ Nwerukna wam kaa, “M máam ma ò bù nye mmehie, ma ò búo nye mmehie. Kòvu otu nhne bù ke me mahiaru, m kpuru m isni nù mbòm, kítina m nòowhnu osno.”

²⁶ Be sika kwno a, “Kini bù nhne o mernu i? Ndaa kpa o jiri kpume anya i?”

²⁷ Ò saru be, “M kannu m anu nù mbòm, anu kwéle o bno nsni. Anu piòru ò nù a berere? Anu noopio ò búru ele sno apna a sa?”

²⁸ Be kpasì a iwhnerne, kaa, “I bù nye sno apna nye ka, a bù ele sno apna Mozizi. ²⁹ A magwu nù Chiokike kwunnu Mozizi òka, kòvu nye ka, a máa hne o hi va.”

³⁰ Nwerukna wam saru be, “Ka bù nhne tu n'anya, anu máa hne o hi va, kòvu o kpumernu anya m. ³¹ A magwu nù Chiokike zá noobnonu ele mmehie nsni, kòvu o noobnonu ele nòosobisinu a nsni bù ele neeme nhne naamasì a. ³² Ke òwa panizoru, ò zá nye nùleru nù o nwernu nye kpumernu anya nye be murnu n'isni. ³³ Ò búru nù nwerukna ka híge n'aka Chiokike, o jéenwe rikne mee nhne òbula.”

³⁴ Be saru a, “Be murnu i, znulizo i nù rime mmehie. I jòobu nye jeezni aì nhne sa?” Be chihala a nù rime òro ògbako ele Ju.

Isni ke Enine

³⁵ Nga Jizōsi nūnu nū be chīhalaru a, o pohia a, kaa, “I kweru nū Nnwọ ke Badnū?”

³⁶ Nwerukna wam sika Jizōsi, “Nda-a-kwu, kanū m nye ọ bụ ma m kweru m nū ya.”

³⁷ Jizōsi kanū a, “I whnūnam a, ọ bụ nye nook-wunu i ọka kītna.”

³⁸ Nwerukna wam kaa, “Nyenwe aī, m kweru m.” Ọ kpọnu a risi n'eli.

³⁹ Jizōsi kaa, “M varū m n'owa o kpe ikpe, ma ele kpuru isni whnūnu ọsno, ma ele nọowhnu ọsno kpu isni.”

⁴⁰ Agwna ele Farisi zī hne ọ zī nūnu nhne o kwuru, be sika a, “A bụ ele isni masi?”

⁴¹ Jizōsi kaa, “Ọ bụru nū anū kpuru isni, ikpe mmehie ba mána anū, kọvu anū karū nū anū nọowhnu ọsno, anū bụ ele ikpe mmehie marnū.”

10*Jizōsi ọmarnā nye
znū atnūnu*

¹ Jizōsi kaa, “Me kanū anū ezi ọka, nye ọbula ke gála nū ọnu-mgbo bna n'oro atnūnu, kọvu garū apna berere bna, bụ nye buznu n'ezi. ² Nye ke garū n'ọnu-mgbo bna n'oro atnūnu bụ nye nọoznu atnūnu. ³ Nye neese ọnu-mgbo jaagbanū a ọro, rụmu atnūnu a nūnu nkoli a, o sukwu rụmu atnūnu a nū rēwhna be, duru be whoga. ⁴ Nga ọ chīhiaru be, o beru be ọsno, rụmu atnūnu a snornu a n'aznū, kwnornu nū be magwū nkoli a. ⁵ Be jóosno nye berere, kọvu be jaagbawhu, kwnornu nū be máa nkoli nye izne.” ⁶ Ka bụ elulu Jizōsi tnūnu be, kọvu be ghóyage nhne ọ naakanū be.

⁷ Jizọsi kanụ be berere, “Me kanụ anụ ezi ọka, mawa bụ ọnu-mgbo ke atnụnnu. ⁸ Kpakara ele beru m ọsno va bụ ele buznu n'ezi. Atnụnnu wam bnóne be nsni. ⁹ Mawa bụ ọnu-mgbo. Be jọoznohia nye ọbula ke jeehi nụ rime m bna, ọ jaabna nụ rime, whọga kwno n'ederezi, whnụ ọri ọ jaata. ¹⁰ Nye buznu varụ ma o znu buznu, gbu ogbu, lulu nhne, kọvu m varụ m ma be nwehia bụdnu, bụ bụdnu ke zuru ozu.

¹¹ “Mawa bụ ọmamarna nye znụ atnụnnu. Ọmamarna nye znụ atnụnnu jiknennu ọ nwunụ atnụnnu a ẹnwu. ¹² Nye be gnornu ẹnụ, nye atnụnnu wam bụo ke a, jẹsigbasi atnụnnu gbawhu nga ọ whnụnnu edu naava. Edu tagbu atnụnnu, chikeme kwo be. ¹³ Ọ gbarụ ẹso kwnornu nụ atnụnnu bụo ke a, ọ bụ nye be gnornu ẹnụ, bụdnu rụmu atnụnnu wam zila a mkpa.

¹⁴ “Mawa bụ ọmamarna nye znụ atnụnnu. M maam atnụnnu m, atnụnnu m magwụ m masi. ¹⁵ Lele kpa Nda m magwụ m, bụ kpa me magwụ Nda m. M nọotusanu rụmu atnụnnu m bụdnu m. ¹⁶ M nwernu m rụmu atnụnnu berere ke zá n'ogbori atnụnnu ka, m jeegweya be. Be masi jọonu nkọli m, kpakara be jọoburu otu ogbori atnụnnu. Be jeenwe otu nye znụ atnụnnu. ¹⁷ Ka bụ nhne kpayarụ Nda m jiri whnụ m n'anya kwnornu nụ m kweru m ọ tubita bụdnu m, ma m gwelizo a berere. ¹⁸ Ọ zá nye nanahia m bụdnu m. Mawa bítaru a hite nụ mkpọma m. M nwernu rikne ọ bíta a, m nwe masiri m rikne o gwelizo a. Ka bụ nhne Nda m nyernu m n'iwu.”

¹⁹ Ka kpayarụ okewa kwno n'esilawuru ele Ju.

²⁰ Agida be naakaa, “Rennwu ojo nwugwu a, ọ bụ nye

era. Kìni mernu anụ noobno a nsni?”

²¹ Kọvu ele berere kaa, “Nye ẹnwu ojo nwugwu, o jookwu oka kpa? Ndaa kpa ẹnwu ojo jookpumeli anya nye isni?”

Ókwe ekwe ke ele Ju

²² N'ige Iriri Onyewhete Ọro Nsọ Chiokike duru nụ Jeruselem, n'ige okirika, ²³ Jizọsi zị n'Ọro Nsọ Chiokike neezne izne nụ mgbemgbe ọro Solomon.

²⁴ Ele Ju gba a gburugburu, znekwnusi a, kaa, “Ị bítaru a n'ọchichiri ogologo ige, kawamanụ aị ọ bụrụ nụ jịwa bụ Karaịsi.”

²⁵ Jizọsi sarụ be, “M kannụ m anụ, kọvu anụ kwége. Ẹrnu ndu-ẹhni m nọrnu nụ ẹnwha Nda m naagbanụ m akebne. ²⁶ Kọvu anụ kwége kwnornu nụ anụ bụo atnurnu ke m. ²⁷ Atnurnu ke m nọonu nkọli m, m maam be, be noosno m n'aznụ. ²⁸ M neenye be bụdnu kwó okwo, be jọonwu rịa rịa. Ọ zá nye nwernu rikne dọhala be n'aka m. ²⁹ Nda m nye nyernu m be kakwo kpakara nhne berere. Ọ zá nye nwernu rikne dọhala be n'aka Nda m. ³⁰ Me nụ Nda m bụ otu.”

³¹ Ele risi ele Ju tụturu kwno akaworugwu be jọotu a. ³² Jizọsi kanụ be, “M rnurnu m agịda ẹrnu ndu-ẹhni nụ ruwhnu anụ ke Nda m nyernu m, ndaa ẹrnu ke anụ kwnornu nụ a nọotu m akaworugwu?”

³³ Ele Ju sarụ a, “A jọotu ị akaworugwu kwnornu nụ ẹrnu oma, kọvu kwnornu nụ ị kwuluru Chiokike hne ị bụ badnụ etekne, ị neeme ẹhni ị Chiokike.”

³⁴ Jizọsi sarụ be, “Ọkwukwo nsọ anụ kwuru nụ Chiokike sukwuru be chi. ³⁵ O sukwuru be chi bụ ele nurnu ikwu-ọnu Chiokike, aghalaghala zịla nụ

nhne be gbarụ n'okwukwo nsọ. ³⁶ Nda m hōhiaru m, bīta m nsọ, ziya m n'owa. Ndaa kpa me nookwulu Chiokike kwnornu nụ m karụ m nụ m bụ m Nnwọ Chiokike? ³⁷ Anụ kwé, ọ bụru nụ m zá m nọornu ẹnu Nda m. ³⁸ Kọvu ọ bụru nụ m nọornu ẹnu Nda m, ọ bụbedi nụ anụ kwéle nụ me, anụ kweru n'ẹnu m, ma anụ mahia nụ Nda m zị nụ rime m, me nụ rime Nda m.” ³⁹ Be pio ọ nwudne a berere, kọvu o hi n'aka be whogaru.

⁴⁰ Jizọsi lahna n'aznụ Osimini Jodani kiyari, hne Jóni wuru mini nụ mbom. Ọ daziri pị. ⁴¹ Agida ele badnụ vakwnusi a, kaa, “Jóni rnúge ẹnu ndu-ehni, kọvu kpakara nhne Jóni kwuru gbasiri nwerukna ka bụ ezi oka.” ⁴² Agida be kweru nụ ya pị.

11

Enwu Lazarọsi

¹ Otu nwerukna rẹwhna bụ Lazarọsi, nye wu nụ Bẹtani, dnarnụ ẹhni igbugbu. Bẹtani bụ hne Meri nụ nwene a rinya Mata wu. ² Ka bụ Meri wam ke wụsiri Jizọsi mọno otute, gweru rukerize a kwnosnama ọchi a, bụ nye nwene a rukna Lazarọsi dnarnụ ẹhni igbugbu. ³ Rumu nne a rinya ziznenu Jizọsi izi kaa, “Nyenwe aị, enyi i ke ị whnurnu n'anya naariya ariya.”

⁴ Nga Jizọsi nurnu a, ọ kaa, “Ehni igbugbu ka jọobu enwu Lazarọsi, kọvu o jeenye Chiokike igwugwu ma be hite nụ a nyee Nnwọ Chiokike igwugwu.” ⁵ Jizọsi whnurnu Mata nụ nwene a rinya nụ Lazarọsi n'anya. ⁶ Kọvu nga ọ nurnu nụ Lazarọsi naariya ẹhni igbugbu, ọ daziri nụ hne ọ zị ọbochi lawuru berere.

⁷ Omekwo, ọ kanụ ele sno apna a, “Anụ va ma a lahna Judiya.”

⁸ Ele sno apna a kanụ a, “Nye-zni-nhne, o gbúle ọkwnu ele Ju pioru ọ tụ akaworugwu, ị naalahna kọriri pịi?”

⁹ Jizọsi sarụ be, “Otu ọbochi nwernu nri nụ awa lawuru, nye ọbula ke znernu izne n'iwhehnie jọkpobi ọchi, kwnornu nụ ọ nọowhnu iwhe k'owa. ¹⁰ Kọvu ọ bụru nụ o zne izne n'abalị, ọ jọkpobi ọchi, kwnornu nụ ọ zị iwhe zị nụ rime a.”

¹¹ Nga Jizọsi kwukworu kpa, ọ kaa, “Lazarọsi enyi aị neezni anyarna, kọvu m jeezne ma m kpatne a.”

¹² Ele sno apna a kaa, “Nyenwe aị, ọ bụru nụ o neezni anyarna, ẹhni jọoburu a ọma.” ¹³ Kọvu nhne Jizọsi nookwu bụ nụ Lazarọsi nwụnam. Kọvu be neech nụ ọ bụ ozni anyarna etekne.

¹⁴ Jizọsi kawhnomenu be, “Lazarọsi nwụnam. ¹⁵ Mkpọma nọoso m n'ọnu kwnornu anụ, nụ m zịla m hne ọ nwurru, ma anụ kweru. Anụ lizọ ma a znekwnusi a.”

¹⁶ Tọmosi, nye be kwu Didimọsi (ke bụ ejima) kanụ ele sno apna a ibne a, “Anụ lizọ ma a snornu a zne, ma a snornu a nwụ ẹnwu.”

Jizọsi, olizọ n'ẹnwu nụ bụdnu

¹⁷ Nga Jizọsi vaduru, ọ whnuru nụ be lilem Lazarọsi ọbochi ẹno wheru ewhe. ¹⁸ Bẹtani dula maịli lawuru hite nụ Jeruselem. ¹⁹ Agịda ele Ju varu ọ kasi Mata nụ Meri mkpọma kwnornu ẹnwu nwene be rukna. ²⁰ Nga Mata nurnu nụ Jizọsi

vawa, ọ whọga znekwnusi a, kọvu Meri daziri n'oro.

²¹ Mata kanu Jizosi, “Nyenwe ai, ọ buru nu i zi hna, nwene m rukna bo ọ nwuna. ²² Kọvu m maam nu nhne obula i rioru n'aka Chiokike, o jeenye i ya.”

²³ Jizosi kanu a, “Nwene i rukna jeelizọ berere.”

²⁴ Mata sa a, “M maam nu o jeelizọ berere n'obochi ipne-aznu.”

²⁵ Jizosi kanu a, “Mawa bu olizọ n'enwu nu budnu. Nye obula ke kweru nu me, ọ burubedi nu ọ nwuru onwu, ọ jaazi budnu. ²⁶ Berere kwno, nye obula ke zi budnu kweru nu me jonwu enwu tim tom. Mata, i kweru nhne me nookwu?”

²⁷ Mata saru, “Owe! Nyenwe ai, m kweru m nu ji bu Karaishi, Nnwọ Chiokike ke varu n'owa.”

Jizosi kwnarnu ekwna

²⁸ Nga Mata kwukworu ka, ọ lahna, sukwu Meri nwene a rinya ichne kanu a, “Nye-zni-nhne zi hna, o noosukwu i.” ²⁹ Nga Meri nuru ka, o lizo wara wara ma o kwnusi Jizosi. ³⁰ Jizosi yaavaduge nu rime eli-ohna, ọ zi koriri nu hne Mata kwnusiri a.

³¹ Ele Ju be nu Meri zi n'oro naakasi a mkpoma, snornu a nga be whuru nu o lizoru wara wara whoga. Be neechu nu o neezne akwna ekwna n'ilili.

³² Nga Meri duru hne Jizosi zi, whnu a, ọ dna n'eli n'ochi a, kaa, “Nyenwe ai, ọ buru nu i zi hna, nwene m rukna bo ọ nwuna.”

³³ O meturu Jizosi nu mkpoma nga ọ whuru Meri nu ele Ju sno a naakwna ekwna, o gbu a igbugbu nu mkpoma. ³⁴ Ọ sika be, “Ndaa hne anu vubiri a?”

Be kaa, “Nyenwe ai, va whuru.”

³⁵ Jizọsi kwnarnu ẹkwna.

³⁶ Ele Ju kaa, “Le, ọ whnurnu a n'anya k'agida.”

³⁷ Kọvu agwna be kaa, “O kpumernu anya nwerukna kpuru isni, ọ bụ nụ o jéenwe rikne mee Lazarọsi gharu ọ nwu ẹnwu?”

*Jizọsi mernu Lazarọsi hi
n'ẹnwu lizọ*

³⁸ O gbu kwno Jizọsi igbugbu nụ mkpọma, o zne n'ilili be gwuru nụ rime rugwu, be jiri rugwu kpusni ọnu a. ³⁹ Jizọsi kaa, “Anụ gweme rugwu ka.”

Mata, nwene rinya nwerukna wam nwurnu ọnwu kaa, “Nyenwe aị, ọ jeenwe ẹknarna ọjo, kwnornu nụ tna bụ ọbochi ẹno be liri a.”

⁴⁰ Jizọsi kaa, “Me kannu i nụ i jọowhnu igwugwu Chiokike ọ buru nụ i jeekweru kpọi?”

⁴¹ Be vume rugwu wam. Jizọsi lelizọ anya n'olu, kaa, “Nda m, meka, kwnornu nụ i bnonem me nsnị. ⁴² M magwu m nụ i noobnonu m nsnị ige ọbula, kọvu kwnornu nụ ele ka zị hna m nookwu a ma be kweru nụ jị ziyaru m.”

⁴³ Nga o kwukworu ka, o gweru okne nkọli siwama, “Lazarọsi, whụya.” ⁴⁴ Nwerukna wam nwurnu ọnwu whụya, nye be ji ikpe iznu whụ a aka lawuru nụ ọchi lawuru, nụ ikpe be jiri whụ ruwhnu a. Jizọsi kanu be, “Anụ tọma a, ma ọ la.”

*Be gbaru iznuznu
o gbu Jizọsi*

(Mat 25:1-5; Mak 14:1,2; Luk 22:1,2)

⁴⁵ Agida ele Ju ele varu elekwa Meri whnurnu nhne Jizọsi mernu, kweru nụ ya. ⁴⁶ Kọvu agwna be lahna kanu ele Farisi nhne Jizọsi mernu. ⁴⁷ Ele Farisi nụ ele risi arịohna kwu ikwu kaa, “Ndaa

nhne a neeme? Nwerukna ka nọornu agida ẹnu ndu-ẹhni. ⁴⁸ Ọ bụru nụ a gharu a, o neezne nụ ruwhnu, kpakara ele badnu jeekweru nụ ya. Ele Rom jaava lulu ẹli aị ma Ọro Nsọ aị.”

⁴⁹ Otu nyenum n'esilawuru be, ẹwhna a bụ Kayafasi, nye bụ nye risi ariohna n'awha wam, kaa, “Anụ máa nhne rịa rịa. ⁵⁰ Ọ bụru oma nụ otu badnu nwuhianu kpakara badnu ẹnwu, ma kpakara mba gharu o whu etekne.”

⁵¹ N'ezi ọka, o kwúge nhne ka hite nụ mkpoma a, kovu lele nye risi ariohna n'awha wam, ọ whnurnu ọwhnurninya nụ Jizọsi jọonwuhianu ele Ju ẹnwu. ⁵² Ọ búo ele Ju kpọi, kovu kwnornu kpakara rumu Chiokike be chisaru nụ kpakara ọwa, chikota be ma be bụru otu. ⁵³ Hite n'ọbochi wam ele risi ele Ju bete ọ gba iznuznu kpa be joogbu Jizọsi.

⁵⁴ Kam kpayaru, Jizọsi zíma neezne izne nụ ruwhnu ọhna n'esilawuru ele Ju, kovu ọ whọga zne hne zị ndundu n'eli-ikpa, bna n'otu ẹli be kwu Ifirem, ya nụ ele sno apna a daziri pị.

⁵⁵ Ige Iriri Ọgawhe ele Ju zị ndundu, agida ele Ju zne Jeruselem, zne ọ bita ẹhni be nsọ sụ ọ dụ Iriri Ọgawhe be. ⁵⁶ Be noopio Jizọsi, be gbako n'Ọro Nsọ Chiokike, be nẹsikwa ibne be, “Ndaa nhne bụ echiche anụ? Ọ bụ nụ ọ jáava Iriri ka sa?” ⁵⁷ Ele risi ariohna nụ ele Farisi nyernu iwu, kaa, nye ọbula ke magwu hne Jizọsi zị kanu be ma be nwudne a.

12

*Be teru Jizọsi mọno
nụ Bẹtani
(Mat 26:6-13; Mak 14:3-9)*

¹ Ọ gwnarnụ ọbochi isunu Iriri Ọgawhe ele Ju dū. Jizọsi znernu Bẹtani hne Lazarọsi nwerukna wam o mernu o hi n'ẹnwu lizọ. ² Be sinu Jizọsi wiri anyasnu, Mata neezne izi, Lazarọsi bụ otu nụ ele Jizọsi dazị neeri wiri. ³ Meri gweru otu olori mọno otute zị gburu ọnu be jiri nadi zị snam mee, ke nwernu ẹknarna ọma wụsi n'ọchi Jizọsi, gweru rukeri-ize a kwnosnama a. Ẹknarna mọno wam jihia rime ọro.

⁴ Otu nụ rime ele sno apna Jizọsi be kwu Judasi Isikarioti, nye jeere Jizọsi, kaa, ⁵ “Kini mernu be réle mọno otute ka riwhu mkpuru iwai ẹto, kesi ele mboni?”

⁶ Ọ búo nụ nhne gbasiri ele mboni neemetu a nụ mkpoma mernu o jiri kwu kpa. Kọvu kwnornu nụ ọ bụ nye buznu, ya neejị ẹkpa iwai be, neeri nhne zị a nụ rime.

⁷ Jizọsi saru a, “Gharu nwerinya ka, ọ bitaru ka kwnornu ọbochi be jeeli m. ⁸ Jị nụ ele mboni zị kpakara ige, me nụ jị jáazị kpakara ige.”

Be gbaru iznuznu o gbu Lazarọsi

⁹ Agida ele Ju nurnu nụ Jizọsi zị nụ Bẹtani, be va, ọ búo kwnornu Jizọsi kpọi, kọvu ma be whnurnu Lazarọsi nye Jizọsi mernu o hi n'ẹnwu lizọ. ¹⁰ Ele risi ariohna ma mmuma kpa be joogbu Lazarọsi masi. ¹¹ Agida ele Ju gharuru ele risi ele Ju kweru nụ Jizọsi kwnornu Lazarọsi.

Jizọsi bnaznenu Jeruselem

(Mat 21:1-11; Mak 11:1-11; Luk 19:28-40)

¹² N'òbochi ke sno a, agìda ele badnụ ele varụ Iriri Oḡawhe nurnu nụ Jizọsi vawa Jeruselem. ¹³ Be gburu igwugwu bukwa whọga zne kwnusi a, neesi lulo,

“Ozana! * Chiokike ọzi nye naava nụ rẹwhna Nyenwe aị,
Chiokike ọzi eze Izireli.”

¹⁴ Jizọsi pohia otu nnwọ iyinya daziri n'olu a, lele kpa okwukwo nsọ kwuru,

¹⁵ “Ị tuko ogwnu, jị adna Zayoni,
Le, eze i gba nnwọ iyinya naava.”

¹⁶ Ele sno apna a ghọyage n'ige wam, kọvu nga Jizọsi hiri n'enwu lizọ n'igwugwu, be chenwanya nhne okwukwo nsọ kwuru gbasiri a nụ be mernu a nhne ka.

¹⁷ Agìda ele badnụ wam whnurnu nga Jizọsi suk-wuharu Lazarọsi n'ilili, mee ma o hi n'enwu lizọ. Be kaharu nhne mernu. ¹⁸ Ka kpayaru agìda ele badnụ znekwnusi a, kwnornu nụ be nurnu nụ ọ rnurnu ẹnu ndu-ehni ka. ¹⁹ Ele Farisi kanu ibne be, “Le, ọ zá nhne a neemeli, kpakara ọwa sno a n'aznụ.”

Agwna ele Giriki noopio

Jizọsi

²⁰ Agwna ele Giriki znernu Jeruselem n'ige Iriri wam zne kponu Chiokike risi ẹli. ²¹ Be vakwnusi Filipu nye Bẹtesaida nụ ẹli Galili, kaa, “Nda-aị-kwu, a noopio ọ whnụ Jizọsi.” ²² Filipu zne kanu Anduru, be lawuru zne kanu Jizọsi.

²³ Jizọsi saru be, “Ige wam valẹm ma be nyee Nnwọ ke Badnụ igwugwu. ²⁴ M kanu anu ezi ọka,

* **12:13** Ozana n'ikwu-ọnu ele Hiburu, ke bu “Znọhia!”

otu mkpuru ikpa zi etekne nga be kpásiila a nù rime n'eli. Nga be kpasiri a, o nwuma, fuhia, mi agida ike ikpa berere. ²⁵ Nye obula ke nòowhnu budnu a n'anya jootuwhu a, kovu nye sno budnu a irno n'owa ka jaabita a du budnu kwó okwo. ²⁶ Nye obula ke nòornunu m ernu joosno m n'aznu. Hne me zi nnwó izi m jaazi pi. Nda m jòosobisinu nnwó izi m.

*Jizosi kwuru oka
gbasiri enwu a*

²⁷ “Kĩta mkpoma m naala mini. Ndaa nhne me jaakaa? Mjaakaa, ‘Nda m, i kwéko ige ka va’? Kovu ka bu risi nhne me kwnornu va. ²⁸ Nda m, nyee rewhna i igwugwu.”

Otu nkoli hiri n'oligwe dna, kaa, “M nyene m a igwugwu, m jeenye kwno a igwugwu berere.”

²⁹ Igbudu ele badnu wam gwuzo pi kaa, “Egbe oligwe gbaru.” Ele berere kaa, “Enine izi kwunnu a oka.”

³⁰ Kovu Jizosi karu, “O buo kwnornu me nhne nkoli ka kwuru oka, o bu kwnornu anu. ³¹ Kĩta bu ige be jeekpe owa ka ikpe, kĩta be jechihala nye risi ke owa ka. ³² Kovu me, o buru nu be gwelizo m olu n'owa, m jodoru kpakara badnu nyee ehni m.”

³³ O kwuru ka ma o gesi okpa enwu o joonwu.

³⁴ Igbudu ele badnu wam kaa, “A nurnu hite n'iwu ai nu Karaisi jaazi tim tom. Ndaa kpa i naakaa nu be gwelizo Nnwó ke Badnu olu? Nyele bu Nnwó ke badnu?”

³⁵ Jizosi kanu be, “Anu jeenwe iwhne ige mati, anu zne izne nu rime a, o zi ochichiri vakwnusi anu. Kwnornu nu nye neezne izne n'ochichiri máa nhne o neezne. ³⁶ Anu tukwasi ovu n'iwhne kĩta

anụ nwernu a, ma anụ bụru rụmu ke iwhne.” Nga Jizọsi kwukworu ọka ka, ọ whọga, tugwa ẹhni a.

Ókwe ekwe ke ele Ju

³⁷ Ọ bụ n'ezị nụ Jizọsi rnụnu kpakara ẹnu ndu-
ẹhni ka n'anya be, be kwéruge nụ ya. ³⁸ Ka bụ ma
nhne Azaya nye ọwhnurninya kwuru mezu,
“Nyenwe aị, nyele kweru izi a ziri,
ndaa nye Nyenwe aị kpumennu aka dikne a?”

³⁹ Kwnornu nụ be kwéle, Azaya kwuru nụ hne
berere,

⁴⁰ “Chiokike mernu be kpu isni,
mee mkpọma be bụru nhne nwurnu ọnwu,
ma be gharu o ji anya be whnụ ọsno,
gweru mkpọma be ghọhia, ma be tūhnasna,
ma m gwọ m be.”

⁴¹ Ka bụ nhne Azaya kwuru kwnornu nụ ọ
whnurnu igwugwu Jizọsi, o kwu ọka gbasiri a.

⁴² N'ige wam agida ele risi ele Ju kweru nụ Jizọsi,
kọvu kwnornu nụ ele Farisi, be nwée rikne kwuhia
nhne gbasiri a, ọ zị be chihala be n'oro ọgbako ele Ju.

⁴³ Be mernu kpa, kwnornu nụ be whnurnu ọznarni
ke badnụ n'anya kakwo ọznarni ke Chiokike.

Ikwu-ọnu Jizọsi jeekpe ikpe

⁴⁴ Jizọsi gweru okne nkọli siwama, kaa, “Nye
ọbula ke kweru nụ me, o kwéruge nụ me kpọi,
kọvu ma nụ nye ziyaru m. ⁴⁵ Nye ọbula ke neele
m anya jọowhnu nye ziyaru m. ⁴⁶ M varu m
n'ọwa lele iwhne, ma nye ọbula ke jeekweru nụ me
jáadazigidne n'ọchichiri.

⁴⁷ “Nye ọbula ke jọonu ikwu-ọnu m, kọvu zá
naabita be, m jéekpe a ikpe, kwnornu nụ m váge m

o kpe ọwa ikpe, kọvu ọ znọhia ọwa. ⁴⁸ Nye ke zụsaru m, zá naabịta ikwu-ọnu m nwernu nye jeekpe a ikpe. Ikwu-ọnu me kwuru jeekpe a ikpe n'ọbochi ipne-aznụ. ⁴⁹ Kwnornu nụ m kwúge m ọka ke m, kọvu Nda m nye ziyaru m nyernu m iwu nhne me jaakaa, nụ nhne me jookwu. ⁵⁰ M magwụ m nhne o nyernu n'iwu bụ bụdnu kwó okwo. Nhne me kwuru bụ nhne Nda m karụ me kwu.”

13

*Jizọsi snurnu ọchi
ele sno apna a*

¹ N'ọbochi ke bọru ọbochi Iriri Ọgawhe, Jizọsi magwụ nụ ige ọ jaaghasa ọwa ka lakwnusi Nda a dulam. Ọ whnurnu ele ka ele zị n'ọwa n'anya. Ọ whnurnu be n'anya dụ ipne-aznụ.

² Kpa be neeri wiri anyasnu, Ekwensu yisiri a nụ mkpọma Judasi Isikarioti nnwọ Saiṃoni o re Jizọsi. ³ Jizọsi magwụ nụ Nda a yisilem kpakara nhne n'aka a, nụ o hi hne Chiokike zị va, ọ naalah-nakwnusi Chiokike. ⁴ O lizọ n'olu wiri, wopu iwo olu a, gweru akata kne n'ikwnu a. ⁵ Ọ wusi mini nụ rime agbụgba, bete nọosnu ọchi ele sno apna a, gweru akata o kne n'ikwnu nookwnosna be.

⁶ O va hne Saiṃoni Pita zị, Pita sịkwa a, “Nyenwe aị, ị jọosnu ọchi m?”

⁷ Jizọsi sarụ a, “Ị máa nhne me neeme kịtna, kọvu omekwo, ị jaamahia.”

⁸ Pita kaa, “Ị jọosnu ọchi m rịa rịa.”

Jizọsi sarụ a, “Ọ bụru nụ m snúge m ọchi ị, me nụ jị nwéko nhne ọbula.”

⁹ Pita saru a, “O buru kparam, i snu ochi m kpoi, kovu snu ma aka m lawuru ma risi m.”

¹⁰ Jizosi saru a, “Nye hniarnu ehni zi richna kparam, o kwésile o snu ehni a berere, okwolem o snu ochi a. Kpakara anu zi richna, kovu o buo kpakara anu.” ¹¹ Kwnornu nu Jizosi magwu nye jeere a, bu nhne o kwno kaa nu kpakara be zi richna, okwolem otu badnu kpoi nye zila richna.

¹² Nga o snukparu be ochi, o woru iwo olu a berere daziri eli nu hne o zi nu mbom. O sika be, “Anu ghohiaru nhne me mennu anu? ¹³ Anu noosukwu m Nye-zni-nhne, nu Nyenwe anu, o bu ezi oka, kwnornu nu o nhne me bu. ¹⁴ Kiti, me bu Nyenwe anu nu Nye-zni-nhne snuru ochi anu, anu kwesiri o snurita ochi ibne anu. ¹⁵ M gesiri m anu nhne atu ma anu mee kpa me mernu. ¹⁶ Me kanu anu ezi oka, o za ohi ke kakwo nyenwe a, o za nnwo izi ke kakwo nye dusiri a izi. ¹⁷ Mkpoma joso anu n’onu, o buru nu anu mahiaru nhne ka, neeme be.

¹⁸ “M za m nookwu kwnornu kpakara anu. M magwu m ele me hohiaru, kovu nhne okwukwo nso kwuru jeemezuri, ‘Nye riri wiri m lizoru megidne m.’ ¹⁹ M naakanu anu ezi oka kiti si o mee, ma nga o jeeme anu kweru nu m bu m ya. ²⁰ Me kanu anu ezi oka, nye obula ke jaanabnanya nye me ziznenu, nabnanyarnu m, nye nabnanyarnu m, nabnanyarnu nye ziyaru m.”

*Jizosi kwuru oka
gbasiri o rure a*

(Mat 26:20-25; Mak 14:17-21; Luk 22:21-23)

²¹ Nga Jizōsi kwuru ka, o gbu a igbugbu nū mkpoma k'agida, ọ kaa, “Me kanụ anụ ezi ọka, otu badnụ n'esilawuru anụ jeere m.”

²² Ele sno apna a lehnata ẹhni be anya. Be máa nye ọ naakaa. ²³ Otu nye sno apna a Jizōsi whnurnu n'anya ke dazi Jizōsi ndundu n'ẹhni. ²⁴ Saịmoni Pita kanụ a, “Sikwahia a nye ọ bụ.”

²⁵ Nye sno apna wam dnabnenu nū mkpoma Jizōsi sịkwa a, “Nyenwe ai, ọ bụ nyele?”

²⁶ Jizōsi sarụ a, “Ọ bụ nye me jeerusi brẹdi ka nū rime wiri nyee.” O gweru otu ibekala brẹdi, rusi a nū wiri nyee Judasi, nnwọ Saịmoni Isikarioti.

²⁷ Ngangam Judasi gweruru brẹdi wam, Ekwensu bna nū rime a. Jizōsi kanụ a, “Ọ zị nhne i neeme, mee a wara wara.” ²⁸ Ọ zá nye zị pị neeri wiri mahiaru nhne Jizōsi nookwu. ²⁹ Hne ọ bụ Judasi vugwu rẹkpa iwai, agwna ele sno apna Jizōsi neeche nū Jizōsi kannu a o zne zuya nhne be jeeri n'Iriri wam, mọbu o kesi ele mboni iwai. ³⁰ Judasi narnu brẹdi wam, ọ whoga ngangam. Ka neeme n'abali.

Iwu ikne

³¹ Nga Judasi whogaru, Jizōsi kaa, “Kịtna, be jeenye Nnwọ ke Badnụ igwugwu, be jeenye masị Chiokike igwugwu nū rime a. ³² Ọ bụru nū be nyee Chiokike igwugwu nū rime a, Chiokike jeenye Nnwọ a igwugwu n'iwhuru a. O jeeme a kịtna.

³³ “Rumu m, me nū anụ jáazi gbu ọkwnu. Anụ joopio m, kovu me kanụ anụ nhne me kannu ele risi ele Ju, anụ jéenwe rikne va hne me neezne.

³⁴ “M neenye anụ iwu ikne, anụ whnụ ibne anụ n'anya. Lele kpa me whnurnu anụ n'anya, anụ

ji ọgwo ọ whnụ ibne anụ n'anya. ³⁵ Kpakara ele badnụ jaamahia nụ anụ bụ ele sno apna m, ọ bụru nụ anụ whnụ ibne anụ n'anya.”

*Jizọsi kwuru nụ Pita
jọogonahoru a*

(Mat 26:31-35; Mak 14:27-31; Luk 22:31-34)

³⁶ Saịmoni Pita sịkwa a, “Nyenwe aị, i zne hnele?”

Jizọsi saru a, “Anụ jéenwe rikne sno m hne me neezne kịtna, kọvu omekwo, anụ joosno m.”

³⁷ Pita sịkwa a, “Kini mernu me jéenwe rikne sno i kịtna? M jọonwunu i ẹnwu.”

³⁸ Jizọsi saru a, “I jọonwu kwnornu m n'ezi? Me kanu i ezi ọka, su okne ọchichi kwna ẹkwna, i jọogonahoru m mgba ẹto.”

14

Jizọsi bụ apna

¹ “Mkpoma ląkwadia anụ mini. Anụ kweru nụ Chiokike, anụ kweru masi nụ me. ² Agida ọro jiri n'oro Nda m, m naala zne mekwatanu anụ ọnodi. Ọ bụru ọ bụo kpam, m znernu m ọkanu anụ. ³ Me zne mekwatanu anụ ọnodi, m jeehiehna, kwuru anụ yisi n'ehni m, ma me nụ anụ daziri n'otu hnanum.

⁴ Anụ magwu apna hne me neezne.”

⁵ Tọmosi kanu a, “Nyenwe aị, a maa hne i neezne, ndaa kpa a jaamahia apna a?”

⁶ Jizọsi saru a, “Mawa bụ apna nụ ezi ọka nụ budnu. Ọ zá nye jeezne hne Nda m zi okwokọlam ma o hiri nụ me. ⁷ Ọ bụru nụ i magwu m n'ezi, i jaamahia Nda m masi. Hite kịtna anụ magwu Nda m, anụ whnuna a anya.”

⁸ Filipu kaa, “Nyenwe aì, gesi aì Nda ì, o joozunu aì.”

⁹ Jizọsi saru a, “Filipu, me nu anu zi ogologo ige ka, ì máa nye me bu? Nye obula ke whnuru m, whnurunam Nda m. Ndaa kpa ì naakaa, ‘Gesi aì Nda.’

¹⁰ O buru nu ì kwége sa nu m zi m nu rime Nda m, Nda m zi nu rime m? Ikwu-onu me nookwu buo ke m. Nda m ke zi nu rime m noonu eru a. ¹¹ Anu kweru nga me karu nu m zi m nu rime Nda m, Nda m zi nu rime m. O buru nu o zá nhne berere, anu kweru kwnornu nu eru ele ka. ¹² Me kanu anu ezi oka, nye obula ke kweru nu me joonu eru me noonu. Owe! O joonu eru ke kakwo ka kwnornu nu m naalakwnusi Nda m. ¹³ Kpakara nhne anu joorio nu rewhna m, m jeeme a, ma be nyee Nda igwugwu hite nu Nnwọ a. ¹⁴ Nhne obula anu rioru nu rewhna m, m jeeme a.

Jizọsi kweru mkwna Enine Nso

¹⁵ “O buru nu anu whnuru m n'anya, anu jaabita nhne me nyernu n'iwu. ¹⁶ M jaariasno Nda m, o jeenye anu Nye Okasi Mkpoma berere, nye jaadazinu anu tim tom. ¹⁷ O bu Enine ezi oka, ke owa jaanahiali, kwnornu nu ele zi n'owa nwée rikne whnu a mobu mahia a. Kovu anu magwu a, kwnornu nu o wu nu rime anu, o jaadazigidnenu anu. ¹⁸ M jaagharu anu etekne, m jeehiehnakwnusi anu. ¹⁹ Ige mati owa joowhnu m, kovu anu joowhnu m. M zi m budnu, kam kpayaru anu jaazi masi budnu. ²⁰ N'obochi wam, anu jaamahia nu m zi m nu rime Nda m, anu nu rime m, lele kpa me zi nu rime anu.

²¹ “Nye ọbula ke jaabịta nhne me nyernu n'iwu, bu nye whnurnu m n'anya. Nye whnurnu m n'anya bu nye Nda m jowhnu n'anya, m jowhnu masi a n'anya, gweru ẹhni m gesi a.”

²² Judasi (ọ bụo Isikarioti) kaa, “Nyenwe ai, ndaa kpa i jeegesi ai ẹhni i, ọ bụo ele ọwa?”

²³ Jizosi saru a, “Nye ọbula ke whnurnu m n'anya, jaabịta ikwu-ọnu m. Nda m jowhnu a n'anya, me nu Nda m jaavakwnusi a, ai nu ya joowu. ²⁴ Nye ọbula ke whnuge m n'anya, jaabịta ikwu-ọnu m. Ikwu-ọnu ke anu nurnu bụo ke m. Be hi n'aka Nda m, nye ziyaru m.

²⁵ “M naakanu anu ka kpa me nu anu zi. ²⁶ Kovu Nye Okasi Mkpoma wam, Enine Nso, nye Nda m jeeziyanu anu nu rewhna m, jeezni anu kpakara nhne. O jeeme anu chenwanya kpakara nhne me znirni anu. ²⁷ M neesigbasinu anu udno, m neenye anu udno m, ọ bụo lele kpa ọwa neenye bu kpa me neenye anu. Mkpoma lakwadia anu mini. Anu tuko ogwnu.

²⁸ “Anu nurnu kpa me karu nu m jaala, kovu m jeehiehnakwnusi anu. O buru nu anu whnurnu m n'anya, anu znernu onwudna, kwnornu nu m naalakwnusi Nda m, kwnornu nu Nda m kakwo m. ²⁹ M kannu m anu kitna hne o yeemege, ma nga o jeeme anu kweru. ³⁰ M jaakanu anu agida oka berere, kwnornu nu nye neechi ọwa ka vawa. Kovu o nwée rikne hne me zi. ³¹ Kovu ọwa jaamahia nu m whnurnu Nda m n'anya, bu nhne kpayaru me neeme kpakara nhne lele kpa o nyernu m iwu. Anu va ma a whoga hna.

15

Isisi vaïni nù nkala a

¹ “Mawa bụ isisi vaïni n'ezi, Nda m bụ nye ẹnu ẹkwu. ² Nkala ọbula ke mịge mkpuru nù rime m, o gbukwama a. O kwnasna nkala ọbula ke naami mkpuru ma o mịnya agida mkpuru, ma o ziri rịchna. ³ Anụ zị rịchna hite n'ikwu-ọnu me kwuru. ⁴ Anụ dazigidne nù rime m, me nù rime anụ. O zá nkala ke nwernu rikne mị mkpuru n'ehni a, okwolem ma o zị n'isisi, otu aka wam, anụ nwée rikne mị mkpuru, okwolem ma anụ dazigidnenu nù rime m.

⁵ “Mawa bụ isisi vaïni, anụwa bụ nkala a. Nye ọbula ke jaadazigidne nù rime m, me nù rime a, jaami agida mkpuru, kwnornu nù anụ nwée rikne meli nhne ọbula hne me zila. ⁶ Nye ọbula ke dazigidnene nù rime m, be jootuwhu a lele nkala ke mịge mkpuru. O kpọnwu, ele badnụ chikota kpọrne a nù bẹkwu. ⁷ O bụru nù anụ dazigidne nù rime m, ikwu-ọnu m dazigidne nù rime anụ, anụ jọorio nhne ọbula zị anụ mkpa, o jọoburu ke anụ. ⁸ Ka bụ nhne neenye Nda m igwugwu, anụ mịnya agida mkpuru, ke jeegesi nù anụ bụ ele sno apna m.

⁹ “Lele kpa Nda m whnurnu m n'anya, bụ kpa me whnurnu anụ n'anya. Anụ dazigidne n'owhnun'anya m. ¹⁰ O bụru anụ bita nhne me nyernu n'iwu, anụ jaadazigidne n'owhnun'anya m, lele kpa me bitaru nhne Nda m nyernu n'iwu, m dazigidne n'owhnun'anya a. ¹¹ M naakanụ anụ nhne ka ma ovu ọso n'ọnu m ziri nù rime anụ, ma ovu ọso n'ọnu anụ zu ozu. ¹² Ka bụ nhne me nyernu n'iwu, anụ whnurita ibne anụ n'anya lele kpa me whnurnu anụ n'anya. ¹³ O zá ọwhnun'anya ke kakwo ka,

nụ badnú tuwhuru búdnú a kwnornú ele enyi a. ¹⁴ Anụ bú ele enyi m, ọ búru nụ anụ mee nhne me nyernu n'iwu. ¹⁵ M zá m noosukwu anụ ele izi berere, kwnornu nụ nnwọ izi máa nhne nyenwe a neeme. Kọvu m sukwuru m anụ ele enyi m, kwnornu nụ kpakara nhne me nurnu n'ọnu Nda m bú nhne me kannu anụ. ¹⁶ Ọ búo anụ hohiaru m, kọvu me hohiaru anụ, bíta anụ ichne, ma anụ zne mịnya mkpuru, ma mkpuru anụ dazigidne. Ka jeeme, nhne ọbula anụ jọorio Nda m nụ rẹwhna m, o jeenye anụ. ¹⁷ Ka bú nhne me nyernu n'iwu, anụ whnụrita ibne anụ n'anya.

Ọwa snornu ele sno apna Jizọsi irno

¹⁸ “Ọ búru n'ọwa sno anụ irno, anụ chenwanya nụ o beru ọsno sno m irno. ¹⁹ Ọ búru nụ anụ bú ke ọwa, ọwa jọowhnu anụ n'anya lele nhne ke a. Kọvu m hohiaru m anụ hite n'ọwa, anụ búo ke ọwa, ka kpayaru ọwa snornu anụ irno. ²⁰ Anụ chenwanya nhne me kannu anụ, Ọ zá ọhi ke kakwo nyenwe a. Ọ búru nụ be kpaknarnu m ẹhni, be jaakpakna anụ ẹhni masi. Ọ búru nụ be bítaru ikwu-ọnu m, be jaabíta ke anụ. ²¹ Be jeeme anụ kpakara nhne ka kwnornu nụ anụ kweru nụ rẹwhna m, be máa nye ziyaru m. ²² Ọ búru nụ m váge m kwunu be ọka, ikpe mmehie báamana be. Kít na be jeeji kịni gọhoru ẹhni be hite nụ mmehie? ²³ Nye ọbula ke snornu m irno, snornu Nda m irno. ²⁴ Ọ búru nụ m rnúge m ẹrnu n'esilawuru be ke ọ zá nye berere rnurnu, ikpe mmehie báamana be. Kít na be whnurnu nhne me rnurnu, be sno me nụ Nda m irno. ²⁵ Ka bú ma

nhne be gbarụ n'okwukwo nsọ mezu, 'Be snornu m irno hne ọ zá nhne me mernu be.'

²⁶ “Nga Nye Okasi Mkpoma wam varụ, Enine ke ezi oka, Nye me jeeziya hite nù hne Nda m zị, nye hi hne Nda m zị va, ọ jaagbanụ m akebne. ²⁷ Anụ jọobu masị ele akebne m kwnornu nù me nù anụ zị hite n'ọpanizo.

16

¹ “M kannụ m anụ kpakara nhne ka ọ zị anụ dnahnala hite n'okwnata ovu anụ. ² Be jaachihala anụ n'oro ogbako ele Ju, ige vawa nga nye obula ke gburu anụ jeeche nù ọ nọornu ernala Chiokike. ³ Be jeeme anụ nhne nù kpa kwnornu nù be máa Nda m mọbu me. ⁴ M kannụ m anụ nhne ele ka, ma nga be jeeme anụ chenwanya nù m kannụ m anụ nhne gbasiri be. M káge m be nù mbom kwnornu nù me nù anụ zị.

Ernu ke Enine Nso

⁵ “Kịtna, m naalahna hne nye ziyaru m zị. Kọvu ọ zá nye n'esilawuru anụ n̄esikwa m, 'Ndaa hne i neezne?' ⁶ Kịtna me kannụ anụ, o noogbu anụ igbugbu nù mkpoma. ⁷ Kọvu me kanụ anụ ezi oka, ọ kanụ anụ mma me lahna, kwnornu nù ọ bụru m láge m, Nye Okasi Mkpoma wam jáavakwnusi anụ. Kọvu me la, m jeeziyanu anụ ya. ⁸ Nga ọ varụ, ọ jaabanụ ọwa mbna kwnornu mmehie, nù ome mma nù ikpe. ⁹ Ọ jaabanụ ọwa mbna gbasiri mmehie, kwnornu nù be kwége nù me, ¹⁰ gbasiri ome mma, kwnornu nù m naalakwnusi Nda m, anụ jọowhnuma m anya berere, ¹¹ gbasiri ikpe, kwnornu nù ikpe hieru nye risi n̄echi ọwa ka.

¹² “Agịda nhne zị ke me jaakanụ anụ, kọvu anụ jéenwe rikne vuru be kịta. ¹³ Kọvu nga Enine ezi ọka wam varụ, o jooduru anụ bna nụ kpakara ezi ọka. O jóokwu nhne aka ke a, kọvu kpakara nhne ọ jọonu bụ nhne ọ jaakanụ anụ. O jaakanụ anụ nhne ke jaava nụ ruwhnu. ¹⁴ O jeenye m igwugwu kwnornu o jeegweru nhne me kwuru kanụ anụ. ¹⁵ Kpakara nhne Nda m nwernu bụ ke m. O bụ nhne me jiri kaa nụ Enine Nsọ jeegweru nhne ke m kanụ anụ.

Nhne igbugbu nụ snarnịma

¹⁶ “Ige matị anụ jọowhnu m berere, omekwo, ige matị anụ jọowhnu m.”

¹⁷ Agwna ele sno apna a n̄esikwarita ibne be, “Kini bụ risi nhne ka? O karụ, ‘Ige matị anụ jọowhnu m, ige matị anụ jọowhnu m,’ berere, ‘M naalakwnusi Nda m.’ ” ¹⁸ Be n̄esikwarita ibne be, “Kini bụ ige matị? A máa nhne o nookwu ọka a.”

¹⁹ Jizọsi whnurnu nụ be noopio ọ sịkwa a, ọ kanụ be, “M karụ m ige matị anụ jọowhnu m, omekwo, ige matị anụ jọowhnu m. O bụ nhne anụ n̄esikwarita n'esilawuru anụ? ²⁰ Me kanụ anụ ezi ọka, anụ jaakwna ẹkwna, gba mkpe, kọvu ọwa jọonwudna. Anụ jeenwe nhne igbugbu, kọvu nhne igbugbu anụ jọogho ovu ọso n'ọnu. ²¹ Nga nyerinya n̄omu nnwọ, ọ zị nụ nhne igbugbu kwnornu nụ rime neeme a, kọvu nga ọ mụdnarnu nnwọ, o chezu kpakara nhne igbugbu a, kwnornu snarnịma nụ ọ murnu nnwọ ikne n'ọwa. ²² Kpam masị, anụ nwernu nhne igbugbu kịta, kọvu m jọowhnu anụ anya berere, anụ jeenwe snarnịma, ọ zá nye jeenwe rikne nahọru anụ ovu ọso n'ọnu

anụ. ²³ N'ọbochi wam, anụ jọorio m nhne ọbula, me kanụ anụ ezi ọka, Nda m jeenye anụ nhne ọbula anụ jọorio a nụ rẹwhna m. ²⁴ Tem dụ kịtna, ọ zá nhne ọbula anụ rịoru nụ rẹwhna m. Anụ rịo, anụ jenwehịa, ma ovu ọso n'ọnu anụ zu ozu.

Mmeri megidne ọwa

²⁵ “M ji m elulu kwunu anụ ọka, ige vawa nga me jóokwunu anụ ọka n'elulu berere. M jookwunu anụ ọka zị snam nhne gbasiri Nda m. ²⁶ N'ọbochi wam, anụ jọorio nhne nụ rẹwhna m, m jáakaa nụ m jọorio Nda m nụ risi anụ. ²⁷ Kwnornu nụ Nda m n'iwuru a whnurnu anụ n'anya, kwnornu nụ anụ whnurnu m n'anya, anụ kweru nụ m hi m hne Chiokike zị va. ²⁸ M hi m hne Nda m zị va bna n'ọwa, kịtna, m nẹsigbasi ọwa naalahna hne Nda m zị.”

²⁹ Ele sno apna a kaa, “Kịtna, ị nookwunu aị ọka dnornu aị anya, ị zá nookwu n'elulu. ³⁰ Kịtna a magwụ nụ i magwụ kpakara nhne. Ọ zá mkpa nụ nye ọbula sịkwa ị ajiji. Ka mernu a kweru nụ ị hi hne Chiokike zị va.”

³¹ Jizọsi sarụ be, “Anụ kweru kịtna? ³² Ige vawa, ige wam valẹm, nga be jẹechisa kpakara anụ, nye ọbula n'oro ke a. Anụ jẹsigbasi me nụ nsụnu m, kọvu m zá m nụ nsụnu m, kwnornu nụ me nụ Nda m zị.

³³ “M kannụ m anụ nhne ka ma anụ nwe udno nụ rime m. N'ọwa anụ jeenwe mmekpẹhni, kọvu mkpoma si anụ rikne, m megbulem ọwa.”

17

Jizosi kpennu ele sno apna a okpukpe

¹ Nga Jizosi kwukworu oka ele ka, o lelizo anya n'oligwe, kaa,

“Nda m, ige wam vaɓem, nyee Nnwọ i igwugwu, ma Nnwọ i nyee i igwugwu. ² I nyernu a ikn-ernema nū hne kpakara ele badnū zị, ma o kesi kpakara ele ke i nyernu a bụdnu kwó okwo. ³ Ka bụ bụdnu kwó okwo, ma ele badnū mahia i, i bụ otu Chiokike ke bụ ezi, nū Jizosi Karaịsi nye i ziyaru. ⁴ M nyernu m i igwugwu n'owa hite n'ornukpa ɛrnu i nyernu m me rnū. ⁵ Kịtna Nda m, nyee m igwugwu nū ruwhnu i, bụ igwugwu ke me nwernu sū i kpuru owa.

⁶ “M mernu ele badnū mahia rēwhna i bụ ele i nyernu m hite n'owa. Be bụ ele ke i. Jị nyernu m be. Be bītaru ikwu-onu i. ⁷ Kịtna, be magwū nū kpakara nhne i nyernu m hi n'aka i va. ⁸ M nyernu m be ikwu-onu ke i nyernu m. Be gweru a, be magwū n'ezi nū m hi m hne i zị whūya, be kweru nū jị ziyaru m. ⁹ M neekpenu be okpukpe. M zá m neekpenu owa okpukpe, kovu ele wam i nyernu m, kwnornu nū be bụ ke i. ¹⁰ Kpakara nhne me nwernu bụ ke i, kpakara nhne i nwernu bụ ke m masi, be bụ igwugwu m. ¹¹ M zima m n'owa berere, kovu be zị n'owa, m naavakwnusi i, Nda zị nsọ, bīkwata be hite nū rikne ke rēwhna i, rēwhna ke i nyernu m, ma be ziri n'otu lele kpa a zị n'otu. ¹² Nga me nū be zị, m bītaru m be nū rēwhna i, bụ rēwhna ke i nyernu m, m segidnernu m be. O zá nye whuru owhu nū rime be, okwokolam nye wam

whuzne owhuzne, ma nhne be gbarụ n'okwukwo nsọ mezu.

¹³ “M naavakwnusi i kịtna, m nookwu nhne ka n'owa ma be nwernu ovu ọso n'onu m, ma ovu ọso n'onu be zu ozu. ¹⁴ M nyernu m be ikwu-onu i, ọwa snornu be irno kwnornu nụ be búo ke ọwa, lele kpa me búo ke ọwa. ¹⁵ M zá m naakaa jị gweme be n'owa. Kọvu m nọorio i ma i b́ita be zoma n'aka nye ojo wam. ¹⁶ Be búo ke ọwa, lele kpa me búo ke ọwa. ¹⁷ B́ita be nsọ hite n'ezi ọka i, ikwu-onu i bú ezi ọka. ¹⁸ Lele kpa i ziyaru m n'owa, bú kpa me neezizne be n'owa. ¹⁹ M kwnornu be b́ita ẹhni m nsọ, ma be b́ita be nsọ n'ezi ọka.

²⁰ “M zá m neekpenu be okpukpe kpọi, kọvu m neekpekọtanu ele jeekweru nụ me hite n'ikwu-onu be. ²¹ M neekpe ma kpakara be ziri n'otu, Nda m, lele kpa i zị nụ rime m, me nụ rime i. Kpakara be ziri n'otu ma ọwa kweru nụ jị ziyaru m. ²² M nyernu m be igwugwu ke i nyernu m, ma be ziri n'otu lele kpa a zị n'otu. ²³ Me ziri nụ rime be, jị nụ rime m, ma be zu ozu n'ọzi n'otu, ma ọwa mahia nụ jị ziyaru m, nụ i whnurnu be n'anya lele kpa i whnurnu m n'anya.

²⁴ “Nda m, jị nyernu m be, m noopio be daziri hne me zị, ma be whnụ igwugwu m, ka bú igwugwu ke i nyernu m kwnornu nụ i whnurnu m n'anya sị i kpuru ọwa.

²⁵ “Nda ke mee mma, ọwa máa nye i bú, kọvu m magwu m nye i bú, ele ka magwu masi nụ jị ziyaru m. ²⁶ M mernu m be mahia i, m jaazi neeme kpam ma ọwhnun'anya ke i whnurnu m ziri nụ rime be, ma me nụ be búru otu.”

18

Be nwudnernu Jizọsi

(Mat 26:47-56; Mak 14:43-50; Luk 22:47-53)

¹ Nga Jizọsi kpekworu okpukpe ka, ya nọ ele sno apna a whọga whe mini Kidirọni. Be bna n'otu ẹkwu ke zị pịi.

² Judasị nye reru a magwụ pịi, kwnornu nọ Jizọsi nọ ele sno apna a neezne pịi ige ọbula. ³ Judasị chịri ele ọgwunu nọ ele neese Ọro Nsọ Chiokike, ele ele risi ariọhna nọ ele Farisi ziznenu, be vu tọnji nọ ọwa, nọ mgwna ọgwunu.

⁴ Kpa Jizọsi magwụ kpakara nhne jaadnakwasị a, o znekwnusi be, sịkwa be, “Anụ noopio nyele?”

⁵ Be kaa, “Jizọsi, nye Nazareti.”

Jizọsi kaa, “Ọ bụ mawa.” Judasị nye reru a nọ be gwuzo. ⁶ Nga Jizọsi karu, “Ọ bụ mawa,” Be lahna aznụ, dna n'ẹli.

⁷ Jizọsi sịkwa kwno be, “Ndaa nye anụ noopio?”

Be kaa, “Jizọsi, nye Nazareti.”

⁸ Jizọsi kanu be, “M kannu m anụ nọ me bụ ya. Ọ bụru nọ anụ noopio m, anụ gharu ele ka ma be la.” ⁹ Ka bụ ma nhne o kwuru mezu, “Kpakara ele i nyernu m, ọ zá otu ke me tuwhuru.”

¹⁰ Saịmoni Pita ji ama-ọgwunu, ọ mniọhia a, gbu nye izi nye risi ariọhna, bihala a nsni akarikwnunga. Rẹwhna nye izi wam bụ Makọsi.

¹¹ Jizọsi kanu Pita, “Mniọhnasi ama-ọgwunu i n'ọbo a. Ọ bụ nọ m jọonwo okiko awhnụwhnu Nda m nyernu m me nwọ?”

*Jizọsi gwuzo nọ
ruwhnu Anasi*

(Mat 26:57,58; Mak 14:53,54; Luk 22:54)

¹² Ele ọgwunu nụ nye risi be, nụ ele neese Oro Nsọ Chiokike nwudne Jizọsi, be kne a eriri. ¹³ Be beru ọsno gwezne a nụ ruwhnu Anasị, nda nnwerne Kayafasị, nye risi ariọhna n'awha wam. ¹⁴ Ọ bụ Kayafasị nye kannu ele Ju nụ ọ bụru ọma otu badnu nwuhianu kpakara be ẹnwu.

Pita gọnahoru Jizọsi

(Mat 26:69,70; Mak 14:66-68; Luk 22:55-57)

¹⁵ Saịmoni Pita nụ nye sno apna Jizọsi ke berere snornu Jizọsi. Nye risi ariọhna magwu nye sno apna a ka, o snornu Jizọsi bna n'ederezi nye risi ariọhna. ¹⁶ Kọvu Pita daziri nụ ngeri mgbo n'ederezi, nye sno apna wam ke nye risi ariọhna magwu zne kanu nnwọ rinya zị n'ọnu-mgbo, o kwubnanya Pita.

¹⁷ Nnwọ rinya zị n'ọnu-mgbo kanu Pita, “Ị bụ otu nụ rime ele sno apna nwerukna ka.”

Pita saru, “M bula m.”

¹⁸ Iyi nọtụ, ele izi nụ ele neese nhne kpawhusi bekwnu, be gwuzoru gburugburu bekwnu wam naakwna iyi. Pita gwuzo masị n'esilawuru be, naakwna iyi.

Nye risi ariọhna

nẹsikwa Jizọsi ajiji

(Mat 26:59-66; Mak 14:55-64; Luk 22:66-71)

¹⁹ Nye risi ariọhna sịkwa Jizọsi ajiji gbasiri ele sno apna a, nụ nhne o neezni.

²⁰ Jizọsi saru a, “M kwuru m ọka nụ ogbo ọhna, kpakara nhne me znirni bụ n'oro ọgbako ele Ju nụ n'Oro Nsọ Chiokike hne kpakara ele Ju naagbakọ. Ọ zá nhne me kwuru nụ mgwugwa. ²¹ Ị sịkwa m

ajiji, sịkwa ele nũnu nhne me kwuru. Be magwu masi nhne me kwuru.”

²² Nga Jizosi kwuru ka, otu nye neese nhne gbọ a aka, kaa, “Kini mernu i nookwunu nye risi ariohna oka kpa?”

²³ Jizosi saru a, “O buru nu m kwuru m nhne buo oma, gba akebne nhne ojo me kwuru. Kovu o buru nu m kwuru m ezi oka, kini mernu i gbọru m aka?”

²⁴ Anasi zizne a ke Kayafasi nye risi ariohna, hne o kne koriri eriri.

Pita gonahoru Jizosi

berere

(Mat 26:71-75; Mak 14:69-72; Luk 22:58-62)

²⁵ Kpa Saimoni Pita gwuzo naakwna iyi, be sịkwa a, “I buo otu nu rime ele sno apna a sa?”

Pita go, kaa, “M buła m.”

²⁶ Otu nu rime ele izi nye risi ariohna nwene nwerukna wam Pita bihalaru nsni a, gwelizọ onu, sịkwa a, “O buo ji nye me whnũnu n'ekwu wam?”

²⁷ Berere kwno, Pita go, ngangam, okne ochichi kwna ekwna.

Jizosi gwuzo nu

ruwhnu Paleti

(Mat 27:1,2,11-14; Mak 15:1-5; Luk 23:1-5)

²⁸ Be hi n'oro Kayafasi kwuru Jizosi zne n'obna nye ochichi, n'onu osisi. Ele Ju bnána nu rime n'obna kwnornu nu be noopio o bita ehni be richna ma be nwe rikne ri Iriri Ogawhe. ²⁹ Paleti whokwnusi be n'ederezi sịkwa be, “Ndaa nhne anu noobno nwerukna ka?”

³⁰ Be saru a, “O buru nu o buo nye aghorome, a znéne okwuyanụ i ya.”

³¹ Pailetí kaa, “Anụ kwuru a kpe a ikpe lele kpa iwu anụ kwuru.”

Be kaa, “A nwée rikne gbu nye ọbula.” ³² Ka bụ ma nhne Jizọs kwuru mezu ke gbasiri ọkpa ẹnwu ọ ọonwu. ³³ Pailetí lahna n'ọbna, sịkwa Jizọs, “Ị bụ eze ele Ju?”

³⁴ Jizọs sịkwa a, “Kị ọ bụ echiche i, sọbu ele berere kannụ nhne gbasiri m?”

³⁵ Pailetí sa a, “M bụ nye Ju? Ọ bụ ele ke i nụ ele risi ariọhna be kwuyannụ m jị. I mernu kịni?”

³⁶ Jizọs kaa, “Eli-eze m bụo ke ọwa ka. Ọ bụru nụ ọ bụ ke ọwa ka, ele izi m znernu ọlu ọgwnu ma ele risi ele Ju gharụ o gweru m nyee n'aka be. Ọ zá, eli-eze m bụo ke ọwa ka.”

³⁷ Pailetí sịkwa a, “Ke bụ nụ ị bụ eze?”

Jizọs sarụ a, “Jiwa karụ nụ m bụ m eze. Ka bụ risi nhne be kwnornu mụ m nụ nhne me kwnornu va nụ rime ọwa, ma m gbanụ m ezi ọka akebne. Nye ọbula ke zị n'ezi ọka noobnonu m nsị.”

³⁸ Pailetí sịkwa a, “Kini bụ ezi ọka?”

Be marnụ Jizọs ikpe ẹnwu

(Mat 27:15-31; Mak 15:6-20; Luk 23:13-25)

Pailetí whọkwnusi kwno ele risi ele Ju n'ederezi kanụ be, “Ọ zá nhne ojo me whnurnu nụ rime nwerukna ka rịa rịa. ³⁹ Ọ bụ omen'eli anụ me sigbasinu anụ otu nye ikelu n'ige Iriri Ọgawhe. Anụ pioru me sigbasinu anụ eze ele Ju?”

⁴⁰ Kpakara be siwama, “Ọza, ọ bụo nwerukna ka, sigbasinu aị Barabasi.” (Barabasi bụ nye buznu.)

19

¹ Pailetí kwuru Jizosi pñia nhne. ² Ele ogwnu kpa okpu igwnu kpusi a nù risi, be wosi a iwo odno odno. ³ Be znekwnusi a, kaa, “A bekwulem jì, Eze ele Ju.” Be gbọ aka nù ruwhnu.

⁴ Pailetí lahna kwno hne ele risi ele Ju zì, ọ kanụ be, “Anụ le, m jookwuyanụ anụ ya, ma anụ marnụ nù ọ zá nhne ojo me whnurnu nù rime a.”

⁵ Jizosi woru iwo odno odno nù okpu igwnu whụya ederezi, Pailetí kanụ be, “Anụ le nwerukna wam.”

⁶ Nga ele risi ariohna nù ele neese Oro Nso Chiokike whnurnu a, be siwama, “Kpogidne a n'ogba, kpogidne n'ogba.”

Pailetí kanụ be, “Anụ kwuru a kpogidne a n'ogba n'aka anụ. Kọvu me kanụ anụ, ọ zá nhne ojo me whnurnu nù rime a.”

⁷ Ele risi ele Ju kwusi rikne, “A nwernu iwu, iwu aị kwuru nù o kwesiri ẹnwu kwnornu nù ọ kanụ nù ọ bụ Nnwọ Chiokike.”

⁸ Nga Pailetí nurnu ka, ọ tų ogwnu k'agịda. ⁹ Ọ lahna kwno n'obna, ọ sịkwa Jizosi, “Ndaa hne i hi va?” Kọvu Jizosi sála a ọka obula. ¹⁰ Pailetí kanụ a, “Ị zá naasa m ọka, ọ bụ nù ị máa nù m nwernu m rikne ọ sigbasi ị mọbu ọ kpogidne i n'ogba?”

¹¹ Jizosi kaa, “Ị béenwene rikne megidne m ọ bụru nù be nyéne i rikne hite n'oligwe, nye kwuru m nyee n'aka i nwe mmehie ke kakwo.”

¹² Nga Pailetí nurnu ka, ọ gbalị ọ sigbasi Jizosi. Kọvu ele risi ele Ju si ọlo, “Ọ bụru nù ị sigbasi a, ị búo enyi Siza. Nye obula ke neeme ẹhni a eze neemegidne Siza.”

¹³ Nga Paileti nũnu nhne ka, o kwuhala Jizosi ederezi, daziri ẹli nũ ngadna nũ hne be jiri aka-worugwu mee, be kwu n'onu Hiburu Gabata.

¹⁴ Nhne ka mernu n'iwhehnie, n'otnu-ige ke nri nũ ẹbo* n'ọbochi ojiknenu Ọgawhe.

Paileti kanu be “Anu le eze anu.”

¹⁵ Be siwama, “Gwepu a, gwepu a, kpogidne a n'ogba.”

Paileti sika be, “Me kpogidne eze anu n'ogba?”

Ele risi ariohna saru a, “A nwée eze berere kwolem Siza.”

¹⁶ Paileti nyewhete be Jizosi, ma be kpogidne a n'ogba.

Be kpogidnenu Jizosi n'ogba

(Mat 27:32-44; Mak 15:21-32; Luk 23:26-43)

Ele ogwnu kwuru Jizosi. ¹⁷ Jizosi vuru ogba a, o whoga zne hne be kwu Hne Okpokoro Risi (ke bu n'onu Hiburu Golugota.) ¹⁸ Be kpogidne a n'ogba pii, ya nũ ele rukna lawuru berere, otu badnu n'akarikwnunga a, nye ke berere n'akarita a. Jizosi ziri n'esilawuru be.

¹⁹ Paileti gbasiri nhne be jogwnu tukwasi a n'olu ogba a, “Jizosi, nye Nazarẹti, Eze ele Ju.” ²⁰ Agida ele Ju gwnũnu a, kwnornu nũ hne be kpogidnenu Jizosi n'ogba zila ikere nũ rime ẹli-ohna. Be gbaru nhne ogwnugwnu wam n'onu Hiburu, Latini nũ Giriki. ²¹ Ele risi ariohna ele Ju kanu Paileti, “I gbasi ‘Eze ele Ju,’ kovu gbası, ‘Nwerukna ka karu nũ o bu eze ele Ju.’ ”

* **19:14** Ọtnu-ige ke nri nũ ẹbo: okwukwo ke mbom kwuru ige awa ke isunu

²² Paileti saru be, “Nhne me gbaru dazim kpa me gbaru a.”

²³ Nga ele ogwnu kpogidnenu Jizosi n'ogba, be gweru kpakara iwo a kerí n'esilawuru be, keme be nga eno, be gweru a otu otu. Be chiri iwo olu a ke be dowa odowa be duru hi n'olu du n'eli.

²⁴ Be kaa, “A jodowa iwo ka, kovu a joovu ogbanuchi ma a mahia nye jeenwe a.” Ka bu ma nhne be gbaru n'okwukwo nsọ mezu, ke kwuru, “Be keriri kpakara iwo m n'esilawuru be, be ji iwo m vu ogbanuchi.”

Ka bu nhne ele ogwnu wam mernu.

²⁵ Ele gwuzo ndundu nu hne ogba wam zi bu nne Jizosi nu nwene rinya nne a, nu Meri nnwerne Kilopasi, nu Meri Magidalini. ²⁶ Nga Jizosi whnuru nne a nu nye sno apna a wam o whnuru n'anya, o kanu nne a, “Nwerinya, le nnwo i.” ²⁷ O kanu nye sno apna a wam, “Le nne i.” Hite n'ige wam, nye sno apna a wam kwuru a la n'oro a.

Enwu Jizosi

(Mat 27:45-56; Mak 15:33-41; Luk 23:44-49)

²⁸ Kpa Jizosi magwu nu be mezulem kpakara nhne, o mee ma nhne be gbaru n'okwukwo nsọ mezu, o kaa, “Akpiri nọokpo m bekwnu.” ²⁹ Otu idudu manya gbaru oka zi pii, be rusi sponji nu rime a, knesi a nu nkala hisopu, gwelizo nu mgbele-onu Jizosi. ³⁰ Kpa Jizosi nworu manya wam, o kaa, “Okwolem.” O piaya risi a nwuma.

Be duru Jizosi ara nu ikpurutu

³¹ Nhne ka mernu n'obochi ojiknenu, ke bu obochi ke sno Obochi Ozukwa Inwe. O masila ele risi

ele Ju o sigbasi iznu be n'olu oḡba n'Ọbochi Ozukwa Inwe kwnornu nū o bụ okne obochi. Be riasno Paileti ma be gbaji kpakara be ochi ma be vudna iznu be n'olu oḡba. ³² Ele oḡwnu wam zne gbaji ochi nye ke mbom nū nye ke berere ele be kpogidnenu be nū Jizosi n'oḡba. ³³ Kovu nga be vaduru hne Jizosi zi, be whnurnu nū o nwunam, be gbajile ochi a. ³⁴ Otu nye oḡwnu gweru ara dū Jizosi nū ikpurutu, ngangam, oṽnarna nū mini gbahia. ³⁵ Nye wam ke whnurnu nhne ka gbarū akebne, akebne a bụ ezi oka. O magwu nū o nookwu ezi oka ma anū kweru. ³⁶ Kpakara nhne ka mernu ma nhne be gbarū n'okwukwo nsọ mezu, “Be jáagbaji otu okpukpu a.” ³⁷ Nhne be gbarū n'okwukwo nsọ ke berere kwuru, “Ele badnū jeele anya nye wam be dūru ara.”

Be liri Jizosi

(Mat 27:57-61; Mak 15:42-47; Luk 23:50-56)

³⁸ Omekwo, Josefu nye Arimatiya, zne rịo Paileti ma o vuru iznu Jizosi. Josefu bụ nye sno apna Jizosi nū mgwugwa, kwnornu nū o nọtụ oḡwnu ele Ju. Paileti kweru, o va vuru iznu a whoga. ³⁹ Nikodimosi nye znekwnusiri Jizosi n'abalị, snornu Josefu, o gweya mọno nwernu ẹknarna oma be gwarū nhne be kwu maa nū alọsi, zi agida. ⁴⁰ Ele rukna lawuru ka vuru iznu Jizosi, whū a n'ikpe marnū mma nū mọno wam, kwnornu nū kpam bụ kpa ele Ju neeme iznu si be li. ⁴¹ Otu ẹkwu zi ndundu hne be kpogburu Jizosi, otu ilili be gwuru ikne zi nū rime ẹkwu wam, o zá nye be liru nū rime a nū mbom. ⁴² Kwnornu nū o bụ obochi ojiknenu Ọbochi Ozukwa Inwe ele Ju, ilili wam zi masi ndundu, be lite Jizosi nū rime a.

20

Ilili ke ọ zá nye zị a

(Mat 28:1-8; Mak 16:1-8; Luk 24:1-12)

¹ N'ọnu ọsisi n'ọbochi mbọm n'ikwezu, ọ gba kọriri ọchichiri, Meri Magidalini znernu ilili wam whnu nụ be vumenem rugwu be jiri kpusni ọnu ilili wam. ² Ọ gba ẹso znekwnusi Saịmoni Pita nụ nye sno apna a wam Jizọsi whnurnu n'anya. Ọ kanụ be, “Be vumenem iznu Nyenwe aị n'ilili, a máa hne be bítaru a.”

³ Pita nụ nye sno apna a wam whọga, neezne n'ilili. ⁴ Be lawwuru bete agba ẹso, kọvu nye sno apna a kiyari gbawhe Pita, beru Pita ọsno gbadu ilili. ⁵ O whudnahie ẹli whnụ ikpe marnụ mma wam, kọvu ọ bnáge nụ rime. ⁶ Saịmoni Pita va, bna nụ rime ilili. Ọ whnurnu ikpe marnụ mma wam dazị etekne, ⁷ n'ikpe be jiri whụ risi Jizọsi, ya nụ ikpe be pịakotaru be n'otu ichne. ⁸ Nye sno apna a wam ke beru ọsno va, bna nụ rime ilili, ọ whnurnu, kweru masị. ⁹ (Be ghóyage nhne be gbarụ n'ọkwukwo nsọ, nụ o jeehi n'ẹnwu lizọ.) ¹⁰ Ele sno apna a wam lahna.

*Jizọsi gesiri Meri Magidalini
ẹhni a*

(Mat 28:9,10; Mak 16:9-11)

¹¹ Kọvu Meri gwuzoru n'ederezi ilili wam naakwa ẹkwna. Kpa ọ naakwa ẹkwna, o whudnahie le anya nụ rime ilili wam. ¹² Ọ whnụ ele enine izi lawwuru wogwu iwo abọchna dazị ẹli nụ hne iznu Jizọsi zị nụ mbọm, otu nụ risi a, otu n'ọchi a.

¹³ Be sịkwa a, “Nwerinya, kịni neeme i ẹkwna?”

Ọ kaa, “Be vumenem Nyenwe m, m máam hne be vubiri a.” ¹⁴ Nga o kwuru ka, ọ tũhnasna whnụ Jizọsi, kọvu ọ máa nụ ọ bụ Jizọsi.

¹⁵ Jizọsi sịkwa a, “Nwerinya, kịni neeme i ẹkwna? Ndaa nye i noopio?”

Meri che nụ ọ bụ nye ẹrnu ẹkwnu, ọ kaa, “Nda-aị-kwu, ọ bụrụ nụ ọ bụ jị vumernu a, kanụ hne i vubiri a, m jeezne vuru a.”

¹⁶ Jizọsi sukwu a, “Meri.”

Meri tũhnasna, kete a ruwhnu, siwama n'ọnu Hiburu, “Raboni!” (ke bụ Nye-zni-nhne).

¹⁷ Jizọsi kanụ a, “Ị kpákwadia m aka, kwnornu nụ m yáalakwnuznege m Nda m. Kọvu znekwnusi rumu nda m, kanụ be m naalakwnusi Nda m nụ Nda anụ, nụ Chiokike m nụ Chiokike anụ.”

¹⁸ Meri Magịdalini zne kanụ ele sno apna a nụ ọ whnurnu Nyenwe aị, nụ ka bụ nhne ọ kanụ a.

*Jizọsi gesiri ele sno apna a
ẹhni a*

(Mat 28:16-20; Mak 16:14-18; Luk 24:36-49)

¹⁹ N'ogbednachi, n'ọbochi mbọm wam n'ikwezu, ele sno apna a gbakọru n'otu ọro tũgidne ẹhni be ọnuhna, kwnornu be nọotu ogwnu ele risi ele Ju. Jizọsi varụ gwuzoru n'esilawuru be, kaa, “Udno zịnu anụ.” ²⁰ Nga o kwuru ka, o gesi be aka a lawuru nụ ikpurutu a. Mkpọma sọ ele sno apna a n'ọnu kpa be whnurnu Nyenwe aị.

²¹ Jizọsi kaa kwno berere, “Udno zịnu anụ, lele kpa Nda m ziyaru m, ọ bụ kpa me neezni anụ.”

²² Nga o kwuru ka, o nwesi be inwe, kaa, “Anụ nahọru Enine Nsọ. ²³ Ọ bụrụ nụ anụ gbarunu ele badnụ mmehie be, be jaagbarunu be mmehie be,

kòvu ò búru nù anù jáagbarùnu be, be jáagbarùnu be.”

Jizòsi nù Tòmosi

²⁴ Otu nù nri nù badnù lawùru wam sno apna Jizòsi, nye rẹwhna a bú Tòmosi, nye be kwu Didimòsi nù be zíla nga Jizòsi varù. ²⁵ Ele sno apna a ele berere kanù a, “A whnùrnu Nyenwe aì.”

Tòmosi kanù be, “Okwolem ma m whnùrnu m anùnu ituru nù aka a lawùru, m yisi mkpaka aka m nù rime be, yisi aka m n'ikpurutu a, m jéekweru.”

²⁶ N'ikwezu a, ele sno apna Jizòsi gbakògwu kwno n'otu òro, tẹgidne ẹhni ọnuhna, Tòmosi nù be zì masì. Be tẹsnirni òro, kòvu Jizòsi varù gwuzoru n'etilawùru be, kaa, “Udno zìnu anù.” ²⁷ Ò kanù Tòmosi, “Yisi aka ì hna, le aka m lawùru, dnọsnima aka ì yisi n'ikpurutu m, ì nwéma mkpọma lawùru, kweru.”

²⁸ Tòmosi sarù a, “Nyenwe m nù Chiokike m.”

²⁹ Jizòsi kanù a, “I kweruru kwnornu nù ì whnùrnu m, ngọzi zìnu ele whnúge, kòvu be kweru.”

Risi ọkwukwo ka

³⁰ Jizòsi rnùrnu agìda ẹrnu ndu-ẹhni berere nù ruwhnu ele sno apna a ke be gbáge n'ọkwukwo ka.

³¹ Kòvu be gbarù ka ma anù kweru nù Jizòsi bú Karaìsi wam, Nnwọ Chiokike, ma hite n'ọkwnata mkpọma nù rẹwhna a, anù jeenwe búdnù.

21

*Jizòsi gesiri ele sno apna a
ẹsau ẹhni a*

¹ Omekwo, Jizọsi gesiri ele sno apna a ẹhni a n'apna berere, nù ngeri Osimini Taberasi. ² Saịmoni Pita, Tọmosi nye be kwu Didimọsi, nù Natanẹli nye Kana ke Galili, nù rọmu rukna Zebidi, nù ele sno apna a lawuru berere zị. ³ Saịmoni Pita kaa, “M neezne o gbu aznụ.”

Be kanụ a, “A joosno i zne.” Kpakara be zne bna n'otu ọgbo, kọvu ọ zá nhne be gburu kpakara abali wam.

⁴ N'ọnu ọsisi, Jizọsi gwuzoru n'ọnu mini, kọvu ele sno apna a maa nù ọ bụ Jizọsi.

⁵ Ọ sịkwa be, “Rọmu takiri, ọ zị aznụ anụ gbuhịaru?”

Be sa a, “Ọza.”

⁶ Jizọsi kanụ be, “Anụ wụsi ịgbo anụ n'akarikwnunga ọgbo, anụ jọowhnu aznụ.” Be wụsi ịgbo be, be nwée rikne dọli ịgbo wam kwnornu nù be gburu agịda aznụ.

⁷ Nye sno apna wam Jizọsi whnurnu n'anya kanụ Pita, “Ọ bụ Nyenwe aị.” Kpa Saịmoni Pita nurnu nù ọ bụ Nyenwe aị, ọ jeru ikpe a (kwnornu nù ọ gba ẹto) dnabna mini. ⁸ Ele sno apna a ele berere kwọru ọgbo, dọru ịgbo wam aznụ jiri va mkpomkpo ẹli. Be zá ikere nù mkpomkpo ẹli, nhne hne lele riwhu rula ẹto. ⁹ Nga be duru mkpomkpo ẹli, be whnurnu esekere bẹkwnu nù aznụ nù zị n'olu a nù brẹdi zị pịi.

¹⁰ Jizọsi kanụ be, “Anụ gweya agwna aznụ anụ gburu.”

¹¹ Saịmoni Pita zne dọru ịgbo wam nù mkpomkpo ẹli, aznụ okpotokpo jiri a, otu riwhu nù nri isne nù ẹto, Ịgbo wam dọkala, ọ bụ n'ezị nù aznụ zị agịda. ¹² Jizọsi kanụ be, “Anụ va ri wiri.” Ọ zá

nye sno apna a ke nwernu rikne o nyipohia sika a, “I bu nyele?” Be magwu nu o bu Nyenwe ai.
¹³ Jizosi gweru bredi wam nyee be, ya nu aznu.
¹⁴ Ka mernu mgb a eto Jizosi gesiri ele sno apna a ehni a kpa o hi n'enwu lizo.

Jizosi nu Pita

¹⁵ Nga be rikworu wiri, Jizosi kanu Saimoni Pita, “Saimoni nnwo Joni, i whnurnu m n'anya kakwo nhne ele ka?”

O sa a, “Owe, Nyenwe ai, i magwu nu m whnurnu m ji n'anya.”

Jizosi kanu a, “Nyee atnurnu m wiri.”

¹⁶ Jizosi kanu a ke mgb a lawuru, “Saimoni, nnwo Joni, i whnurnu m n'anya n'ezi oka?”

O sa a, “Owe, Nyenwe ai, i magwu nu m whnurnu m ji n'anya.”

Jizosi kanu a, “Nooznu atnurnu m.”

¹⁷ Jizosi kanu a ke mgb a eto, “Saimoni, nnwo Joni, i whnurnu m n'anya?”

O gbu Pita igbugbu nu Jizosi kannu ke mgb a eto, “I whnurnu m n'anya?” O kaa, Nyenwe ai, i magwu kpakara nhne, i magwu nu m whnurnu m ji n'anya.

Jizosi kanu a, “Nyee atnurnu m wiri. ¹⁸ Me kanu i ezi oka, nga i bu wikoro, i noosnu ajni n'ikwnu i zne hne obula o masiri i. Kovu, nga i jeeme okno badnu, i jodosni aka i, nye berere snusi i ajni, kwuru i zne hne masila i.” ¹⁹ Jizosi kwuru ka ma o gesi kpa Pita jonwu enwu, ma o nyee Chiokike igwugwu. Jizosi kanu a, “Sno m.”

*Jizosi nu nye sno apna a
ke berere*

²⁰ Pita tũhnasna whnũ nye sno apna a wam, nye Jizõsi whnũrnu n'anya, nye dnabnenu Jizõsi nga be neeri wiri anyasnu wam, sĩawa a, “Nyenwe aĩ, nyele jeere i?” ²¹ Nga Pita whnũrnu a, ọ kanũ Jizõsi, “Nyenwe aĩ, ndaa nhne i kwuru gbasĩri nwerukna ka?”

²² Jizõsi sarũ a, “Ọ bũru nũ m pioru m ọ zĩri bũdnu tem m va, ọ gbásĩa i, sno m.” ²³ Be tũsa a n'esilawũru ele sno apna Jizõsi nũ nye sno apna a ka jõonwu ẹnwu. Kõvu Jizõsi kála nũ ọ jõonwu ẹnwu, kõvu o karũ, “Ọ bũru nũ m pioru m ọ zĩri bũdnu tem m va, ọ gbásĩa i.”

²⁴ Ya bũ nye sno apna a ke kwuru kpakara nhne ka, nye gba masĩri a n'ọkwukwo, a magwũ nũ nhne ọ gbarũ bũ ezi ọka.

Okwukwo

²⁵ Agĩda nhne ele berere ke Jizõsi mernu, ọ bũru nũ be gba kpakara be n'ọkwukwo, m che m nũ kpakara ọwa n'iwhuru a jéenwe rikne vuli kpakara ọkwukwo be jaagba.

Tesitamenti Ikne n'O^{nu} Ikwere **New Testament in Ikwere**

copyright © 2010 Wycliffe

Language: Ikwere

Translation by: Wycliffe

Ikwere – (ikw) Nigeria

The Iwerre language of Nigeria can also be spelled Ikwere and Ikwerri. This language is spoken primarily by the Ikwerre people who live in the Rivers State of Nigeria and is one of the many ethnic groups in the Niger Delta. There were more than 23,000 speakers of this language in 1973. There is also a considerable local interest in literacy and grammar.

Copyright Information

© 2010, The Nigeria Bible Translation Trust. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9789789076369

New

The New Testament

in Ikwere

© 2010, The Nigeria Bible Translation Trust.
All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-08-09

PDF generated using Haiola and XeLaTeX on 11 Nov 2022 from source files dated 29 Jan 2022

c17ee3a1-1c7a-5c05-8e0f-5043e8228d89